

卷之四



西江志卷第六

城池 二 疆域附

廣信府 上饒縣附郭

宋信州城舊基周圍七里五十步高二丈一尺址廣二丈有

奇崇廣如制皇祐二年水圯州守張公實修築中為子城

圍一里二百八十三步高二丈五尺後亦圯淳熙七年州

守林枏因舊址築牙門韓元吉記淳祐十二年復羅泮水

甚於皇祐寶祐二年州守陳昌世重修王雷記初置四門

曰廣信靈山闌闔玉溪後關八門曰望雲信溪葛溪玉溪

香濠涿津春浦三港元因宋舊 明洪武初修築羅城圍

九里二十步高二丈二尺廣一丈五尺仍置四門門覆以

樓樓外為月城正德六年南門樓燬知縣陸徵朱嘉會相





繼修葺萬曆七年南門樓復燬知府錢拱辰重建十年以  
遵旨整飭城垣委千戶張忠加高三尺

國朝順治五年防守康時升大加修築十六年守道胡升猷  
知府樂斯美相繼葺之北城樓燬康熙十一年知府高夢  
說重建自為記

玉山縣

舊無城明嘉靖四十年流賊素三亂後巡撫胡松檄推官姚  
筐始築城圍七里高二仞廣丈有一尺女牆四尺門四東  
潤澤西廉善南垂教北采栗胡松記隆慶間知縣陳所聞  
從民請復闢二門東南曰儒林西南曰杏花萬曆四年知  
縣周日申改南城門楊時喬記十四年知縣張道深復以  
鐵飾門嗣後時圯時葺

國朝順治五年兵變後漸圯女牆無存者康熙八年知縣唐  
世徵捐貲完治之二十一年知縣金毓浩重建西門城樓

弋陽縣

宋淳化間縣治在寶豐鎮慶曆三年徙今治 由元迄明亦  
未建城正德五年姚源盜起知縣胡偉始壘石為四門上  
建門樓方議築城盜平事寢嘉靖三十九年叛兵入閩將  
假道于弋知縣陳仕始築城周圍九百四十二丈高一丈  
八尺廣一丈二尺門四東賓陽西樂成南迎薰北拱極門  
覆以樓置警舍二十五所邑人舒國光記

國朝康熙七年城圯于水知縣陶耀修葺如舊制甲寅賊毀  
後知縣薛巖起捐修十九年又圯于水知縣張龍如捐修  
二十一年洪水積雨又毀知縣譚瑄捐修



貴溪縣

舊無城明正德五年饒寇掠境分守參議居達檄知縣謝寶築土壘石圍七百餘丈高一丈有奇東西南北置四關為捍禦計嘉靖四十年閩廣盜肆巡撫胡松檄同知王時拱大加修築圍一千五十丈高二丈西南帶水東北礪山關四門東迎暎西延暉南文明北拱極俱覆以樓比舊制增廓

國朝康熙十三年叛將柯昇變後城樓焚燬殆盡十九年知縣高駿升重建城樓四十五年知縣韓蕃以東西二城圯于水捐貲再建自為記

鉛山縣

舊無城明洪武九年千戶蔣奎就今址築城周圍四里七十

二步高二丈雉堞三尺許東西南三面鑿池闊四丈深一丈北瀕河為濠為門四東仁壽西義和南嘉會北麗澤西北為水門周城設敵樓五正德十四年為淫雨所壞知縣鄭懋德修之十五年復為雨壞知縣杜民表重築嘉靖三年知縣朱鴻漸修復如故明末復圯

國朝康熙十八年知縣潘士瑞重加葺焉

永豐縣

舊無城明嘉靖四十一年以廣閩盜起巡撫胡松檄知縣斯正築之周圍九百四十七丈址廣一丈八尺高一丈六尺加雉堞六尺為門四東松峰西鶴山南安民北永豐南北別為小門二門覆以樓鑿濠池長與城等廣丈餘深信之少卿呂懷記隆慶六年知縣傅寵增置警舍三十六所有



碑記

國朝康熙四十七年知縣吳之瀚捐俸重修

興安縣

明嘉靖三十九年始置縣四十年知縣陳慶雲始度地築城城依高山東西緣岡阜南遵河壩修築如式周圍八百六十四丈高一丈五尺厚八尺為門四東賓陽西流暉南迎薰北拱極又為小東小西小北門以便出入參政畢竟容記之

國朝仍舊制

疆域

廣信府

廣四百七十五里袤三百二十里東至浙江衢州府常山縣

界一百七十五里西至饒州府安仁縣界三百里南至福建分水關一百六十里北至饒州府樂平縣界一百六十里自府治至省城七百里

路程細數詳各縣

上饒縣

附郭廣一百里袤一百七十五里

一東陸大路自縣東門七十里至黃茅岡本府玉山縣交界  
一西陸大路自縣西門五十里至宋村舖本府興安縣交界  
一南陸大路自縣南門鍾靈橋四十五里至茭塘舖本府永豐縣交界

一小陸路自縣往南由灘頭渡口一百五十里至福建建寧府浦城縣岑陽關交界一自縣往西南由白鶴渡四十五里至石溪本府鉛山縣交界一自縣往北六十五里至鄭



家坊饒州府德興縣交界

一水路自縣往東南由廣安橋六十里至湖昏塘汛本府玉山縣交界一自縣往西由鍾靈橋白鶴渡六十五里至葉村本府鉛山縣交界

玉山縣

在府東一百里廣五十五里袤一百五十五里

一東陸大路自縣東門四十里至草坪村浙江衢州府常山縣交界一西陸大路自縣西門經連城橋五十三里至黃茅岡本府上饒縣交界

一小陸路自縣東門東津橋一百里至浙江衢州府開化縣交界一自縣往西北一百里至江南徽州府婺源縣交界一自縣往南二十五里至張坂塘本府永豐縣交界

一水路自縣西門渡口三十里至湖昏塘汛本府上饒縣交界一自縣東津橋一百一十里至浙江衢州府常山縣草坪交界

弋陽縣

在府西一百二十里廣四十里袤一百四十里

一東陸大路自縣東門十五里至晚港舖本府興安縣交界一西陸大路自縣西港三十里至水門舖本府貴溪縣交界

一小陸路自縣往南由圭峰九十里至福建邵武府光澤縣觀音關交界一自縣往北六十里至石下村饒州府萬年縣交界一自縣西溪橋六十里至秧坂饒州府樂平縣交界一水路自縣東關外渡口八十里至黃沙港本府鉛山縣交



界一自渡口往西七十里至洪家埠本府貴溪縣交界一  
自黃沙港三十五里至福建邵武府光澤縣水路交界  
貴溪縣

在府西一百九十里廣一百里袤二百里

一東陸大路自縣東門三十里至水門舖本府弋陽縣交界  
一西陸大路自縣過後河渡四十里至界山饒州府安仁  
縣交界

一小陸路自縣往北七十里至夾羅村饒州府萬年縣交界  
一自縣南由浮橋渡一百六十五里至福建邵武府光澤  
縣茶山關交界一自浮橋渡九十里至金貴亭撫州府金  
谿縣交界一自縣往南一百二十里至大源建昌府瀘溪  
縣交界

一水路自縣東門渡口二十里至洪家埠本府弋陽縣交界  
一自縣往西浮河渡八十里至東溪渡饒州府安仁縣交  
界

### 鉛山縣

在府南八十里廣一百六十里袤一百四十里

一東陸大路自縣東門四十五里至福建建寧府浦城縣岑  
陽關交界一南陸大路自縣南門七十里至福建建寧府  
崇安縣分水關交界

一小陸路自縣往西一百里至福建建寧府崇安縣火燒關  
交界一自縣往北由水北橋四十五里至石溪本府上饒  
縣交界

一水路自縣往北由河口鎮三十里至葉村本府上饒縣交



界一自河口鎮往西五十里至黃沙港本府弋陽縣交界  
一小水路自縣水北橋八十里至福建建寧府崇安縣溫陵  
關交界

永豐縣

在府東南四十五里廣七十五里袤一百一十里

一東陸大路自縣東門六十五里至浙江衢州府江山縣松  
峰山交界一西陸大路自縣西門二十三里至芟塘舖本  
府上饒縣交界一東南陸大路自縣塘墀渡七十五里至  
福建建寧府浦城縣二渡關交界

一小陸路自縣南門三十五里至芟塘舖本府上饒縣交界  
一自縣往北八十里至浙江衢州府江山縣鳳林交界一  
自縣往西北五十里至烏狗街本府玉山縣交界

一水路自縣往南四十里至洋州本府上饒縣交界一自縣  
往東南九十里至浙江衢州府江山縣湖裏交界

興安縣

在府西八十里廣七十里袤一百五十里

一東陸大路自縣東門窰口塘三十里至宋村舖本府上饒  
縣交界一西陸大路自縣下窰十五里至石塘舖本府弋  
陽縣交界

一小陸路自縣往西南三十五里至楊坊本府弋陽縣交界  
一自縣往北一百二十里至臨江湖本府上饒縣水路交  
界

饒州府

鄱陽縣附郭

舊城秦番君吳芮所築至吳周魴守郡增修之 梁大通中



鮮于琮叛內史陸襄繕城為保障計 宋建炎初舒賊劉文舜寇饒州守連南夫繕治嘉定間水壞州守史定之增修 明吳元年甲辰大水城圯總制宋炳知府陶安即舊址城之千戶趙堅湯禮伍成預其力城周九里十三步負芝山闕鄱江左右環東湖蠓洲三面阻水高一丈八尺厚四之三雉堞三千四百二十六隍深廣丈餘門六北曰朝天靈芝南曰鄱江月波東曰永平西曰蠓洲樓十二守廳六甕城樓一弔橋三嘉靖間兵備副使范輅沈良佐知府彭辨之相繼完治萬曆二十三年知府林欲厦繕修之三十年月波門火樓燬三十四年鄱江樓火三十六年大水城圯分守參政應汝化繕治

國朝順治初年月波門樓燬于火十五年守道張思明捐資重建康熙十三年久雨城圯寇賊蹂躪十七年知府黃家遴鄱陽知縣王克生捐資修築二十年大水復圯二十二年巡道查培繼暨各屬捐資重修

餘干縣

秦置縣時其城池無考劉隨州詩孤城上與白雲齊知唐時已有相傳林士弘所築閱代滋久漫無遺跡 明嘉靖壬戌巡撫胡松以閩廣寇起檄知縣黃士元徵丁糧築之為方三里延袤一千二百丈高一丈七尺厚五尺為門九東曰長春南曰通知西曰武靖北曰拱極東南曰文明通賢西北曰永熙順民東北曰陰德小水門三守宿之廬二十有四正南及西北瀕水餘多枕山姜金和記隆慶間知縣鄭繼之修萬曆中知縣劉諧因濱水易傾就圯者重築之



又塞拱極順民永熙通賢陰德五門並塞三水門改建高冠門于冠山之上崇禎間知縣袁世順重修亂後雉堞無存

國朝順治十六年知縣劉毓安重建東西北三樓康熙二年知縣江南齡繼修其舊塞諸門從民便開之二十二年知縣呂瑋重修

### 樂平縣

唐中和間自樂安舊城遷今治故縣無城但立四門曰洎陽延明利涉景豐 宋末立排柵為城建四門曰朝天平仁文明拱北元至正間兵燬 明正德五年水南盜起知縣龔淵即四門遺址築之砌以石每門建樓東曰東安西曰西樂南曰南平北曰北順北順尋火十一年冬知縣張文

應重修嘉靖中巡撫胡松檄知縣黎楚度地興築黎澄記萬曆二十四年知縣金忠士因諸生議闢建文昌門于學宮前義民洪銃捐資後以形家言復塞之。

國朝順治十年知縣王德明重修康熙十年知縣王道隆建四城樓築垣引洎水東流以衛城郭有記

### 浮梁縣

舊無城元至正間縣令于光始築高一丈六尺周七百二十四丈濬濠深廣各一丈五尺設東西南北小南五門 明永樂中砌以磚石惟存東西南三門正德戊寅知縣劉守愚伐石砌水南拱極二門于南北故址嘉靖十九年水溢城壞知縣汪宗伊依故址重修用形家言塞小南門三十七年知縣蕭奇勳更築之增小東小北二門又訓導霍文



玉請增新南門以爲學宮文筆萬曆三十年大水壞城二百餘丈知縣周起元復修

國朝順治五年大水城壞康熙三年知縣蕭蘊樞修築增高四尺十年四月久雨水南門傾知縣王臨元修之

### 德興縣

環山爲縣四望如堵向無城池止築起鳳門於南化龍門於北白鹿門於東惟西襟帶溪河不設門明正德十四年姚源寇起知縣趙德剛始伐木爲柵以禦寇嘉靖三十五年知縣許高請築城以遷去四十一年知縣何廷相始築城周一千一百一十餘丈高二丈爲門六南鳳儀北拱辰東慶成朝陽西迎天文明六門之上爲樓西城帶河爲濠池水門一水洞七萬曆二十三年西門火知縣何鏞更築之

國朝順治間知縣徐叔雅加修

### 安仁縣

舊無城明正德五年姚源寇起官民廬舍焚燬殆盡知縣薛球因築土城六百餘丈以爲蔽捍計嘉靖五年饒州兵備范輅改築石城周圍七里四十一年巡撫胡松檄縣增城濬池三年工成約一千三百餘丈築石腰牆窩舖一如府制爲門八東育仁西正義南歌薰北拱極東南興賢雲錦西南觀瀾便民規制雄偉西南北三面俱臨大河

國朝仍舊制

### 萬年縣

明正德間巡撫俞諫初壘以石巡撫孫燧副使許廷光繼築之周六百八十丈高一丈八尺厚半之雉堞一千四百餘



為門四各架以樓東寅賓西西成南時阜北拱極池深丈餘廣如之崇禎七年知縣金偉重修

國朝康熙九年知縣王萬鑑重修二十一年霖雨圯數十丈知縣張勸捐修

疆域

饒州府

廣五百三十里袤三百七十里東至浙江衢州府開化縣界三百七十里西至南康府都昌縣界一百六十里南至撫州府臨川縣界二百里北至江南池州府建德縣界一百七十里自府至省城三百里

路程細數詳各縣

鄱陽縣

附郭廣二百八十里袤二百九十里

一東陸大路自縣出東門由薦福寺七十里至大橋本府樂平縣交界一北陸大路自縣出北門一百十五里至界牌舖本府浮梁縣交界一自消坂舖分路往北一百六里至石門江南池州府建德縣交界一自石門分小路九十里至洗馬橋本府浮梁縣交界

一小陸路自縣往東七十里至山塘舖本府樂平縣交界

一東河水路自縣往東一百六十五里至金魚灘本府浮梁縣交界一南河水路自縣一百里至本府樂平縣水路交界一西河水路自縣六十五里至鄱湖口棠陰寨南康府都昌縣交界一自堯山一百三十里至石門江南池州府建德縣交界

餘干縣



在府南一百二十里廣一百二十里袤二百五十里

一東陸大路自縣四十里至古樓舖本府萬年縣交界一西

陸大路自縣六十九里至潤陂舖南昌府進賢縣撫州府

東鄉二縣交界一南陸大路自縣七十里至本府安仁縣

交界

一水路自龍津驛往上六十里至本府安仁縣交界一自龍

津驛四十里至瑞洪汛南昌府進賢縣交界一自同口灘

往府五十七里至石潭寺本府鄱陽縣交界

樂平縣

在府東一百二十里廣二百五十里袤一百四十里

一東陸大路自縣東門一百里至水口廟本府德興縣交界

一西陸大路自縣西門四十里至山塘舖本府鄱陽縣交

界一南陸大路自縣南門三十里至庫前村本府萬年縣

交界

一小陸路自縣東門七十五里至戴家寨本府德興縣交界

一自縣往東五十里至秧坂廣信府弋陽縣交界一自縣

往西三十五里至大橋本府鄱陽縣交界一自縣往南二

十五里至新興舖本府萬年縣交界一自縣往北二十五

里至南村嶺本府浮梁縣交界

一水路自縣官路口五十五里至石鎮街本府鄱陽縣交界

一自官路口由埧口渡九十四里至戴村本府德興縣交

界

浮梁縣

在府東一百八十里廣一百八十里袤一百八十里



西江志 卷六  
一東陸大路自縣東門一百五十里至黃竹嶺江南徽州府  
婺源縣交界一南陸大路自縣南門六十五里至澆嶺江  
南徽州府婺源縣交界一西陸大路自縣西門五十五里  
至界牌鋪本府鄱陽縣交界一北陸大路自縣北門一百  
一十里至苦竹坑江南徽州府祁門縣交界  
一小陸路自縣南門渡四十里至柳家莊本府德興縣交界  
一自縣往北一百十五里至桃樹鎮嶺江南池州府建德  
縣交界一自西門四十五里至洗馬橋本府鄱陽縣交界  
一水路自縣東門往上由青峰渡六十五里至到湖江南徽  
州府祁門縣交界一自縣南門渡往下四十八里至官莊  
金魚灘本府鄱陽縣交界

安仁縣

在府南二百一十里廣四十里袤九十里

一陸大路自縣東榮祿堡二十里至廣信府貴溪縣交界一  
自縣孟津門過渡二十里至大橋鋪撫州府東鄉縣交界  
一陸小路自縣西門一十里至古鎮橋本府餘干縣交界一  
自縣北門三十里至牧羊鋪本府萬年縣交界  
一水路自縣孟津渡往上二十里至東溪渡廣信府貴溪縣  
交界一自孟津渡往下十里至炭埠本府餘干縣交界

德興縣

在府東二百四十里廣一百四十里袤一百二十里

一東陸大路自縣東門八十五里至白沙鋪浙江衢州府開  
化縣交界一南陸大路自縣南門八十五里至漆工鎮廣  
信府弋陽縣交界一西陸大路自縣西門三十里至水口



廟本府樂平縣交界

一東陸小路自縣東門由北嶺三十里至李村江南徽州府  
婺源縣交界一東南陸小路自縣南門七十里至鄭家坊  
廣信府上饒縣交界一西南陸小路自縣出南門十八里  
至戴家寨本府樂平縣交界一西北陸小路自縣出北門  
二十五里至柳家莊本府浮梁縣交界

一水路自縣出北門五十二里至海口村江南徽州府婺源  
縣交界一自大河往下二十里至戴村本府樂平縣交界  
萬年縣

在府東南一百二十里廣八十里袤七十里。

一東陸大路自縣經普德橋八十里至百丈嶺廣信府貴溪  
縣交界

一小陸路自縣往東南四十四里至鳴源廣信府貴溪縣交  
界一自縣往東北五十里至河橋廣信府貴溪縣交界一  
自桐鶴村分路二十三里至石下村廣信府弋陽縣交界  
一自縣往西三十七里至古樓埠本府餘干縣交界一自  
縣往北由南石舖四十三里至庫前村本府樂平縣交界  
一自曹坊村四十五里至新興舖本府樂平縣交界一自  
縣往南六十六里至牧羊舖本府安仁縣交界

南康府

星子縣  
附郭

古無城宋淳祐間知軍方岳築土城五里二十步為倉步匯  
澤門于東臨津彭蠡福星門于南建昌門于西五老門于  
北潯陽門于東南水門于西南未訖役而卒 元增置水  
軍上萬戶府領兵鎮禦至正間徐壽輝率眾攻掠遂為所



西江志 卷六  
陷 明初亦無城至正德六年知府陳霖乃鑿石城之計周千丈高二丈石高一丈五尺廣三丈上甃以磚環以箭臺三十二所為門五東潯陽南彭蠡西建昌北匡廬小西星子巡撫孫燧巡按屠僑咸佐成之大學士費宏記十五年知府張愈嚴復鑿池為隍深一丈五尺闊二丈嘉靖間巡撫胡松閱視東隅低頽拓而增之四十三年知府于聞復鑿城西南為小南門崇禎六年巡撫解學龍增高城三尺傍城引水于濠以環之城內浚井王思任銘焉

國朝康熙三年總督張朝璘改并城堞重建五門城樓

### 都昌縣

舊城在王市鎮唐大曆中遷治今址無城 明正德間知府陳霖建議築城請于巡撫孫燧以寧藩兵變中止嘉靖十

九年知縣楊昱經理城址三十八年巡撫何遷檄知府吳炳庶推官何价知縣林貴兆董其役工未竟各遷去四十二年春霖城圯巡撫胡松移文知縣周希韶甃築告成周迴九百零五丈五尺高二丈厚與高等為門六曰明庶陽亨承恩大有禮賢拱辰門樓六座兵馬廳五所窩舖二十編修萬浩記之萬曆三十八年知縣鄭洪圖于陽亨門建大觀樓壯麗與門稱崇禎十一年知縣楊寅旭增修更門名東靈曜南來薰西南襟帶正西安阜西北寶成北芙蓉國朝仍舊制康熙二十一年水圯知縣曾王孫修葺

### 建昌縣

舊無城明正德十三年知府陳霖建議巡撫孫燧發公帑知縣方鐸先為四門以土築城嘉靖十一年壬子倭亂當事



者以緩急議攻守建昌縣屬鄱湖上游尤當急者二十年  
巡撫胡松檄署事同知楊侃以石築城爲門四曰朝宗仰  
止在川拱辰爲敵臺三十六水門二斗門一曰金帶南北  
延袤三百丈東西倍之踰年工成尚書張鏊記崇禎十六  
年知縣喻琦慶增修

國朝如舊制

安義縣

明正德十三年始立縣巡撫孫燧委通判蔡讓知縣王軾築  
城周迴七百八十丈高一丈六尺廣五尺隍深一丈二尺  
門四曰向陽永安文明迎恩覆以樓會宸濠兵起十五年  
通判林寬署縣事修築猶未竟十六年推官張哲知縣熊  
价奉巡撫鄭岳檄重築完工嘉靖三十七年西門圯知縣

高暘補甃以石建樓其上有記崇禎十三年知縣張士亨  
增高城堞

國朝順治十六年知縣王宗聖重修有記康熙元年知縣毛  
天麒修北門城樓五年知縣魏濟衆修東門城樓七年知  
縣陳瑋修西南二門及窩鋪梁口

疆域

南康府

廣二百六十里袤一百七十里東至饒州府鄱陽縣界二百  
里西至九江府德安縣界六十里南至南昌府新建縣界  
一百二十里北至九江府德化縣界五十里由府治至省

城二百里

路程細數  
詳各縣

星子縣



附郭廣九十里袤一百九十里

一西陸大路自縣西門五十六里至界牌嶺九江府德安縣  
交界

一陸小路自隘口分路往北五十里至康陽坂九江府德化  
縣交界一自敬思港過渡往西南至七里塍本府建昌縣  
交界一自縣出北門三十五里至德星鋪吳障山九江府  
德化縣交界

一水路自縣南門過鄱陽湖水面二十里至龍王廟本府都  
昌縣左蠡鋪交界一自縣東門外四十里至狗頭石九江  
府德化縣交界一自縣南門外四十里至南昌府新建縣  
焦尾洲交界

都昌縣

在府東八十里廣一百六十里袤一百二十里

一東陸大路自縣東門八十一里至章田鋪饒州府鄱陽縣  
交界一西陸大路自縣西門由長嶺鋪五十里至本府星  
子縣交界

一陸小路自井田鋪分路往北五十里至西陽橋九江府湖  
口縣交界

一水路自縣南門外團山往東九十里至棠蔭寨饒州府鄱  
陽縣交界一自縣南門二十里至松門山西鄱湖南昌府  
新建縣交界一自縣南門外三十里至左蠡汎往東又三  
十里至屏峰山九江府湖口縣交界

建昌縣

在府西南一百二十里廣一百二十里袤七十里



一東陸大路由縣東門四十里至豐安村舖南昌府新建縣  
交界一南陸大路由縣南門張家埠五十五里至鄔溪舖  
本府安義縣交界一北陸大路由縣北門四十里至米嶺  
舖九江府德安縣交界

一小陸路由縣西門一百七十里至磨刀嶺南昌府武寧縣交  
界一自縣北門五十里至七里塍本府星子縣交界

一水路自縣東門一百里至蘆潭汛渡口南昌府新建縣吳  
城鎮交界一自縣南門外逆流一百一十里至河撫南昌  
府武寧縣交界一自縣小南門往上一百七十里至閔埠  
本府安義縣交界

### 安義縣

在府西二百里廣六十里袤七十里

一西南陸大路由龍津渡十五里至筲箕舖南昌府奉新縣  
交界一北陸大路由縣北門三十里至鄔溪舖本府建昌  
縣交界

一小陸路由縣西門五里至齊頭山南昌府靖安縣交界一  
自縣東門五十里至石鼻舖南昌府新建縣交界  
一水路自縣南門外龍津埠三十里至閔埠本府建昌縣交  
界一自龍津埠往上至故埠河南昌府奉新縣交界一自  
龍津埠往西北五里至桐城埠二里至姚灘南昌府靖安  
縣交界

### 九江府

德化縣  
附郭

舊傳築於漢灌嬰又云九江王英布所築興廢不一劉宋昇  
明間左中郎將周山圖造樓櫓立水柵宋開寶九年曹翰



屠江州墮其城七尺開禧間守臣俞崇龜重築 元總管  
李黼重修 明洪武二十二年調官軍陸旺等設直隸九  
江衛城凡東西廣五里南北廣四里周十里一百七十八  
步高一丈七尺為門五東磐石南近恩西湓浦北望京東  
北福星礮樓四警舖二十有八永樂十年知府孔復指揮  
鍾信環甃甃之宣德間知府余福指揮蕭儀孫達成化間  
知府蘇致中指揮孫睿弘治間知府童潮指揮邵暹前後  
葺治正德六年兵備洪顯知府李崇正加高三尺十四年  
宸濠兵亂殘毀知府王念葺之嘉靖三年雨圯兵備謝迪  
修築七年知府馮會加高三尺

國朝如舊制

德安縣

舊無城明正德十年知縣陳錦始築土城高丈許周三里門  
五東寅賓南鎮雅西義豐北迎恩又小西門後東南圯於  
水嘉靖十二年知縣劉東議築石城不果二十六年知縣  
蔡元偉上修城議亦以財乏中止四十年雨圯知縣殷乾  
重修

國朝如舊制

瑞昌縣

舊無城明正德八年知縣黃源大請於總制陳金始築土城  
周圍七百餘步高一丈四尺厚六尺為門四東安市西歸  
陽南仙湓北金露溝塹環之又為水洞門依河為險凡歸  
義王仙洪陽之水匯於堰上自西迤邐而東環繞縣治踰  
年告成知府黃相記之萬曆間通判葉朝榮署縣事見水



勢逼城掘高家港引河南徙

國朝初年土寇陷城康熙九年知縣江臯詳請濬河故道築堤障於南引水繞城縣仍據險

### 湖口縣

自南唐設縣負山險無城明嘉靖初副使謝迪旣城彭澤遂及湖口度地計工知縣徐欽興築未就三十四年知縣林高崗設五門曰寅賓振武觀瀾通濟迎春然非久安計三十七年巡撫何遷巡按徐紳檄縣令沈詔自下鐘山麓壘石奠基隨水周迴長一千丈高一丈五尺厚如之增二門曰仰宸利涉建樓設舖祭酒鄒守益記之崇禎九年知縣陳文德加高

國朝順治二年知縣黃基昌修葺康熙三年知縣范之煥增

修

### 彭澤縣

南面臨江舊有土城久圯明正德間流賊掠沿江郡縣知縣何士鳳乃列柵守之嘉靖三年副使謝迪檄知縣李孟熹易築磚城亘長一百七十五步高七尺闊五尺門二曰大觀拱辰六年知縣柯遷復補築之環山左右凡可通人跡者悉壘石爲堞加二門曰賓日文明萬曆間署印通判葉朝榮更增高之

國朝如舊制

疆域

### 九江府

廣五百四十里袤一百五十里東至江南東流縣界三百七



十里西至湖廣興國州界一百七十里南至南康府建昌  
縣界一百五十里北至江即湖廣黃梅縣界自府治至省  
城三百里

路程細數  
詳各縣

### 德化縣

附郭廣一百二十里袤一百二十里

一東陸大路自縣東門六十里至南湖嘴對江本府湖口縣  
交界一西陸大路自縣西門龍開河過渡四十里至洗心  
橋本府瑞昌縣交界一西南陸大路自縣西門潯陽驛八  
十七里至潘溪河本府德安縣交界一自通遠驛分小路  
往東二十三里至康陽坂南康府星子縣交界一北陸大  
路自縣北門渡洋子江北岸清江鎮四十里至孔壠驛湖  
廣黃州府黃梅縣交界

一西陸小路自縣西門龍開河過渡七十五里至潘溪河本  
府德安縣交界一南陸小路自縣小南門三十里至吳障  
山南康府星子縣交界一東陸小路自縣往東四十里至  
大姑塘對江本府湖口縣交界

一水路自縣西門洋子江往上七十里至城子鎮本府瑞昌  
縣交界一自洋子江往下五十里至南湖嘴本府湖口縣  
交界一自南湖嘴分河往上四十里至狗頭石南康府星  
子縣交界

### 德安縣

在府南一百二十里廣一百五里袤六十二里

一東陸大路自縣東門過渡十五里至界牌嶺南康府星子  
縣交界一西陸大路自縣西門六十五里至布袋嶺本府



瑞昌縣交界一南陸大路自縣南門二十里至米嶺舖南  
康府建昌縣交界一北陸大路自縣北門二十五里至潘  
溪河本府德化縣交界

一水路自縣南門傍小河一條往上十里至烏石門水發源  
又自南門往下十五里至敬思港南康府星子縣交界

### 瑞昌縣

在府西九十里廣七十里袤八十里

一東陸大路自縣東門望僊橋三十里至洗心橋本府德化  
縣交界一西陸大路自縣西門黃甲橋三十里至界首舖  
湖廣武昌府興國州交界一自黃甲橋分小路往西八十  
里至肇城湖廣武昌府興國州交界一南陸大路自縣南  
門五十里至布袋嶺本府德安縣交界一北陸大路自縣

北門四十五里至馬頭抵大江湖廣黃州府廣濟縣武穴  
鎮交界

一西南陸小路自縣西門黃甲橋七十五里至雙溪南昌府  
武寧縣交界

一水路自縣出北門往北四十里至下巢湖湖廣黃州府廣  
濟縣武穴鎮對江岸交界一自馬頭汛分水路往下二十  
里至城子鎮本府德化縣交界

### 湖口縣

在府東六十里廣六十里袤一百四十里

一東陸大路自縣東門由小嶺五十三里至西洋橋南康府  
都昌縣交界一自縣東門二十三里至石澗舖本府彭澤  
縣交界一西陸大路自縣西門由虹橋往西上鐘山對江



南湖嘴岸本府德化縣交界

一東陸小路自東門由大嶺三十里至塘山本府彭澤縣交界

一水路大江自縣西門往上對江十里至南湖嘴本府德化縣交界一自縣西門忠臣廟往上進鄱陽湖口二十里至鞵山本府德化縣交界又往東四十五里至屏峰山南康府都昌縣交界一自縣出西門忠臣廟往下三十五里至時家渡本府彭澤縣交界

彭澤縣

在府東一百五十里廣一百二十里袤一百里

一南陸大路自縣南門六十里至石澗鋪本府湖口縣交界

一北陸大路自縣北門往東北四十里至響水磯江南池

州府東流縣交界

一東陸小路自縣東門六十里至下隅坂江南池州府建德縣交界一西陸小路自縣西門鏡子山過渡三十里至塘山本府湖口縣交界一南陸小路自縣南門八十里至肖家嶺饒州府鄱陽縣交界一北陸小路自縣北門三十里至馬當鎮江南池州府東流縣交界

一水路大江自縣出西門往上三十五里至時家渡本府湖口縣交界一水路分東自縣北門三十一里至周家湖江南池州府東流縣交界

南安府 大庾縣附郭

宋淳化間始築城制猶卑薄淳熙間知軍管銳增高之嘉定十二年知軍劉彊學請更增築方鳩工以調去知軍尚振



西江志 卷六  
英繼葺之未久而輟明年知軍陳疇完其工延袤凡十里  
五步環城浚池自爲記 元至正壬辰同知薛理始築今  
城 明正統十四年石溪寇作鎮守侍郎楊寧奏準修理  
景泰中巡撫韓雍繼完厥工雨圮復檄千戶夏忠補葺周  
圍四里一百三十步高一丈三尺廣一丈濠深五尺廣一  
丈警舖三十四爲門四曰宣化朝天就日寶豐弘治十三  
年知府鄭正德九年知府李敷先後加築萬曆二十五年  
知府杜伸重修水南城在章江南與府城夾江而峙嘉靖  
四十年流寇行掠知府吳炳庶知縣文體義議水南另建  
一城巡撫吳百朋疏請給官帑築之計長四百二十四丈  
高一丈五尺爲門四俱覆以樓東岱門南嶠門西垣門北  
鰲門萬曆間署縣同知徐元暘修之

國朝康熙四十八年署篆同知遲維璽重修

按府志尚有新田城鳳凰城楊梅城小溪城峰山城九  
所城皆明嘉靖四十四年鄉民避寇建以自衛者

### 南康縣

舊在今縣治西南宋紹定戊子南安洞寇作亂民苦竄徙邑  
令戴翼始謀築城甃以石周八百二十有八丈翼自爲記  
寶祐間縣令梁峴修之 元至順間縣尹秦濟亨重修

明初山賊曠必隆者焚蕩一空弘治九年知縣周怡始申  
請巡撫金澤兵備張璠築之廣袤計五千八百四十七丈  
高一丈八尺厚一丈三尺爲四門僉事蘇葵記正德六年  
雨圮知府李敷委通判李鎰增築嘉靖九年知縣鄭衷於  
東南隅增開便民門郎中劉寅記



國朝順治十四年知縣鄭思魯重建城樓康熙三年知縣陳暉重修西門城樓火四十四年知縣申毓來捐新之

上猶縣

舊無城宋紹定壬辰邑令胡泓始築城鑿池建四門元時圯明洪武初鎮撫胡海因泓舊址築之南濱江東西北三面有隍歲久復圯惟北門城樓存成化初知縣董瑄鄭璽相繼欲新之未就弘治二年知縣章爵乃底績周圍四百三十七丈高一丈七尺濠闊四尺深八尺四門各建樓僉事黃仲昭記正德四年知府李敷行推官張霆增高五尺知縣姚義於東門外增月城嘉靖十七年大水西城圯知縣谷同補築後知縣胡鑰胡鎬相繼修葺崇禎三年知縣董以道奉檄增修

國朝康熙三十一年水圯邑人蔡熙隆等倡捐典史王道隆監修之三十四年知縣章正萼重修門樓。

按縣志營前城即太傅營在縣治西北一百里明正德間生員蔡元寶等因地接榔桂易於藏奸築城自守嘉靖三十一年以廣賊流劫重修之

崇義縣

明正德十二年巡撫王守仁平峯寇後奏請立縣築城十三年起工以南康縣丞舒富董其役周圍五百丈高一丈七尺闊一丈設四門曰朝陽永安太平迎恩各覆以樓東北臨溪西南鑿濠十四年以霪雨傾頽副使王度委縣丞雷仁補完萬曆四十一年知縣林際春重修之崇禎八年知縣葉元芳闢東南文昌門有記



國朝康熙三十五年北門樓火知縣張為煥重建  
疆域

南安府

廣七百九十里袤七百七十里東至贛州府贛縣界一百八  
十里西至廣東韶州府仁化縣界一百八十里南至廣東  
南雄府保昌縣界二十五里北至吉安府龍泉縣界二百  
八十里自府治至省城一千二十里

大庾縣

附郭廣二百六十里袤五十里

一東陸大路自縣東門雙牌舖八十里至青泥舖本府南康  
縣交界一南陸大路自橫浦橋四十里至梅嶺廣東南雄  
府保昌縣交界

一小陸路自縣往西由浮江隘一百三十五里至廣東韶州  
府仁化縣長江交界一自縣往北由湯坪嶺二十五里至  
義安舖本府崇義縣交界

一小水路自崇義縣聶都發源起二百三十里至本府南康  
縣水路交界

南康縣

在府治東一百三十里廣九十里袤二百二十里

一東陸大路自縣東關外渡口六十里至五總舖贛州府贛  
縣交界一西陸大路自縣西門通粵橋四十里至青泥舖  
本府大庾縣交界

一小陸路自縣南門外過渡三十里至迴堡贛州府信豐縣  
交界一自縣往西五十里至下角嶺本府崇義縣交界一



自縣往北一百里至大回嶺本府上猶縣交界

一水路自縣南關往西上由小溪驛九十里至窩坑塘本府

大庾縣交界一自小溪驛往東下五里至兜口塘汛九十

里至歐潭贛州府贛縣交界

上猶縣

在府治東北二百里廣一百二十里袤九十里

一東陸大路自縣東門猶口橋四十里至大回嶺本府南康

縣交界一西陸大路自縣往西由梅田墩一百五十里至

湖廣桂東縣沙嶺坳交界

一小陸路自縣往南四十里至茶瓶坳本府崇義縣交界一

自縣往北田九十里至白雲嶺吉安府龍泉縣交界

一小水路自縣治石人背渡四十里至南北村渡大回水本

府南康縣交界

崇義縣

在府治北一百里廣二百七十里袤九十里

一南陸大路自縣南門一百里至湯坪嶺本府大庾縣交界

一小陸路自縣往西南一百十五里至百擔坵湖廣郴州府

桂陽縣交界一自縣往西七十里至茶瓶坳本府上猶縣

交界一自過步分路一百三十里至截龍湖廣郴州府桂

陽縣交界一自縣往西北一百五十里至山坑吉安府龍

泉縣交界一自縣往東一百二十里至角嶺本府南康縣

交界

一小水路自縣治東南發源一百二十二里至下角嶺本府

南康縣陸路交界



西江志  
卷六  
三

贛州府

贛縣附郭

晉永和五年郡守高琰始建于章貢二水間義熙中徙贛水東南宋為南康國城于雩都梁承聖初復故處唐刺史盧光稠始拓其南鑿址為隍三面阻水宋熙寧中州守劉彛始開水窗三時啓閉以防患州守孔宗翰甃以石上峙八境臺後守趙繼善高夔楊長孺鄭性之相繼葺之元時圯至正癸巳監郡普安撒里重修戊戌陳友諒陷城其將熊天瑞亦加修理明初吳二年乙巳指揮楊廉修城倚二水為隍其形三隅南衍而北銳圍十三里共二千五百十二丈高三丈舊十三門今開者五東百勝南鎮南西西津北湧金東北建春各建樓其上自西津門起至鎮南門有濠長五百五十二丈又自南門至百勝門計三

百八十五丈闊凡十三丈深淺不等正德間巡撫周南加繕治十三年雨圯知府邢珣白巡撫蔣昇王守仁兵備楊璋修補完整明年復圯兵備王度檄知府盛茂重修嘉靖十三年巡撫陳察重修之羅欽順鄒守益各有記三十五年大水圯知府王春修之萬曆間巡撫李汝華孟一脈知府陸化淳楊瑩天啓間知府余文龍前後修葺崇禎間巡撫王之良增高三尺

國朝順治初各城樓俱焚十二年知府郎永清修復康熙十五年巡撫佟國禎修葺四十三年水圯知府朱光圉倡修

雩都縣

唐始遷今治立土城唐末城圯宋紹興乙丑縣令劉藻因舊土城增砌以磚尋被水圯開禧丁卯縣令趙希閔補築



西泮志 卷六  
紹定間縣令鄧仲度復修 元至正癸巳通判王榮忠署  
縣仍舊基修築圍五里高一丈三尺建六門東迎曦西登  
豐南通津北望雩東南雩壇西北小西上各建樓南臨大  
江三面為隍闊一丈五尺工將訖梅賊奄至遂廢 明成  
化二十一年參政秦民悅檄知縣崔肆修之弘治二年副  
使張璉建城樓五座知縣黃文鉞建警樓二十八間正德  
六年知縣劉天錫增高三分之一嗣後知縣嚴鑾署縣主  
簿梁珩嘉靖間典史郭尚達署縣通判韓恩修之繼圯於  
水知縣羊修補築黃弘綱記萬曆間知縣劉昌祚楊遇黃  
應元先後修葺崇禎十三年知縣鄭楚勳增築之十六年  
知縣張魯傳築敵樓一座

國朝順治十六年知縣李佑之修城樓康熙四十三年知縣

盧振先修葺

信豐縣

宋以前無考嘉定三年知縣萬億仍舊基修築圍五百四十  
九丈建門六東拱日西禾豐北朝天南民信西北清平東  
北安定歲久圯 明洪武二十二年千戶汪淵仍舊加修  
高一丈五尺建警舖一十四間成化元年知縣李玉增築  
二十三年丁未山賊破城巡撫金澤兵備張璉檄知縣倪  
俊修葺正德九年巡撫周南檄知府朱諫增修嘉靖十六  
年水圯知縣徐鑾修之二十三年巡撫虞守愚檄知縣沈  
學重修崇禎十四年知縣王六如增高五尺濬濠廣五尺  
深半之

國朝順治七年雨圯知縣吉允迪補築十二年知縣陳誥十



四年知縣楊宗昌相繼修葺康熙三年知縣張繼掄增修敵樓十五年知縣劉治國增堞濬濠

### 興國縣

舊無城元至正壬辰贛州路判官王榮忠署縣始拓地築城圍五里計四百四十五丈高一丈三尺闊一丈東南阻水西北爲隍廣一丈五尺深三尺有奇長二里三十步門六今開者四東興教西惠化南奉符北泰和歲久圯 明成化二十一年巡撫閔珪知府李璉檄知縣達泰重修弘治六年巡撫金澤檄知縣陳壽增建警舖十八年知縣曾選修葺正德五年流賊破城署縣推官黃紋重修十三年雨圯巡撫王守仁檄知府邢珣修之嘉靖以後知縣李菽易道源李應龍何應彪王芮吳宗周蔡鍾相繼修之

國朝順治五年山寇破城署縣守備李若垠修葺十四年水圯知縣黃之麟補築康熙十六年水圯知縣黃惟桂捐修四十二年洪水潰決城圯什之五知縣張尚瑗捐俸修復自爲記

### 寧都縣

唐太和六年知縣王揆始築子城周顯德五年知縣章仁績增修 宋建炎中寇燬紹興初縣令劉僅重築慶元初知縣傅夢泉謂城門弗端徙于正南紹定六年攝令趙紉夫大修之城完而寇至民賴以守 元延祐乙卯重修至正丙戌邑民曾志遠等募勸重修高二丈圍七百六十五丈爲門六東通濟迎旭西登豐秋成南文明北鎮安濠廣二丈五尺深五尺 明正統十四年知縣周昂重修成化初



會事陳騏檄同知程鶴建門樓董越記二十年知縣金瀾  
增建正德六年兵備王秩檄縣加高之十一年雨圯通判  
莊潤補築十三年知縣王天與復加高之萬曆十年山寇  
越城署縣王繼明增高三尺崇禎間邑人溫國奇等倡建  
新城自五年至九年而工畢爲門七曰長庚拱辰拱秀德  
義陽和朝陽集賢合舊城六門凡十三門

國朝如舊制

會昌縣

宋紹興間縣令黃鉞始築圍二里五十步高一丈五尺三面  
阻水南爲濠廣十丈深六尺長一里五十步 明洪武二  
十二年千戶彭英增拓之上建樓四舊門六元時塞小南  
小西二門存其四曰雙青麗澤鎮湘臨清敵臺二座副千

戶牛壽增高五尺正德七年副使王秩檄知縣林信主簿  
孫鑑重修嘉靖間水圯知縣陳仕修之萬曆間知縣冒夢  
齡加葺

國朝順治五年山寇據城半就傾圯七年知縣王洵修之自  
爲記康熙十年知縣王凝命補葺四十五年水圯知縣董  
靈修之

安遠縣

舊無城明洪武間知縣周泰指揮張可始築土垣以禦廣寇  
經雨久圯成化二十一年知府李璉加木柵以固之弘治  
四年兵備張璉知府周鳳檄知縣甘文紹課民陶甃爲城  
高一丈七尺有奇廣一丈三尺圍四百餘丈池深五尺廣  
一丈一尺門三曰迎薰拱極賓陽門外環以月城建樓曰



西江志 卷六  
鎮山警舖十二正德十三年雨圮巡撫王守仁知府邢珣檄知縣鄧守重修嘉靖四十年知縣石廩增高之四十四年雨圮知縣李多祚重修萬曆五年兵憲向程增築崇禎元年城為丫婆賊所破虔督潘曾紘捐俸二千兩委署印同知謝時旦增築之凌于封記

國朝康熙十八年雨圮二十年知縣于作霖捐修

### 瑞金縣

建始失考元至正癸巳判官王榮忠修築圍三百三十丈高一丈六尺東阻貢水南阻綿水西北為隍延袤二里廣一丈深七尺 明初吳元年甲辰千戶錫廣重修成化間參政張琳檄知縣方瑛展拓城基未就弘治三年副使張璉委推官張巘千戶李宣訓導陳璇等陶甃修砌圍五里城

門四朝陽觀瀾抱秀朝闕皆建樓其上羅環記正德元年雨圮副使陳恪檄署縣杜偉修之巡撫周南檄知縣林禔又增築之九年雨圮知縣葉繼本重修十三年復圮知縣鮑珉重修嘉靖十九年又圮巡撫李顯檄知縣王鈇以石砌築明年知縣趙勳重修東西北三門三十七年知縣程宗舜增高三尺隆慶五年知縣呂若愚闢一門曰宣文萬曆間水圮巡撫秦燿檄知縣喬杞復修

國朝如舊制

### 龍南縣

宋隆興元年知縣段秀實始築土城高一丈圍三百五十丈濠深五尺闊倍之建四門塞其北止開三門 明洪武十五年廣寇破邑城圮成化元年巡按陳選檄知縣謝澤課



民陶甃為城高一丈五尺廣一丈二尺圍四百二十丈建  
城樓三座弘治元年閩寇復破城知府李璉署縣郭榮華  
葺治建警舖二十二濬濠設三石閘以瀦水教諭楊拱記  
次年知縣張文增修之正德七年寇起通判徐珪增高城  
垣五尺九年東門樓圯知縣李聰重建十三年復圯巡撫  
王守仁知府邢珣給官帑令推官危壽修之嘉靖二十九  
年雨圯過半巡撫陶諧命同知伍佐補築萬曆三年知縣  
王繼孝重修自為記崇禎九年巡撫潘曾紘命署縣譚心  
學大擴其制為門六十三年知縣卓震又增高焉

國朝順治五年流賊破城六門俱燬七年知縣賈程誼十三  
年知縣高光國次第修之康熙三十三年大水城圯知縣  
鄭世逢修復

石城縣

舊無城宋建炎末寇警邑人陳皓與知縣余惠迪謀築土城

建五門 明洪武初知縣虞德源修而復圯正統間破於

閩寇成化二十三年知縣聞韶循舊址改築未竣調任去

署縣李寬訖工圍五百四丈高一丈三尺廣一丈東南阻

大溪自西迤北鑿濠為門五曰阜康清遠環秀望仙安仁

弘治四年副使張璉檄推官張憲增高三尺十八年副使

陳恪檄通判謝珪復加三尺正德六年副使王秩檄經歷

周元壽又加高四尺尋雨圯知縣錢季玉修完十三年又

雨圯巡撫王守仁重築建西南二門城樓嘉靖三十五年

洪水壞城知縣成宗曉復修

國朝順治六年城為流賊所破又明年水圯八年知縣董應



西江志 卷六  
譽修之自為記十一年知縣郭堯京再修康熙四十六年知縣陳嘉改修南門

### 定南縣

明隆慶三年知府黃辰奉巡撫張紳檄度地築城周圍二百丈有奇高一丈二尺廣七尺為門三曰迎陽平成豐阜各覆以樓北無門亦立一臺覆以樓南城舊有民塘濬以為池萬曆五年巡撫江一麟增拓其制十年水圯知縣劉世懋重修崇禎十五年知縣鄺賢禎增加城堞

國朝順治初為山賊所燬十四年知縣祝天壽重建城樓康熙十五年坊賊破城焚燬二十年知縣林銑孕捐俸重修三十六年知縣吳邇立復修

### 長寧縣

明萬曆三年知府葉夢熊奉巡撫江一麟題準建縣檄知縣沈文淵築城周迴四百六十二丈九尺高一丈八尺門四曰春旭弦歌阜成陽和覆以敵樓崇禎九年加高四尺國朝順治四年粵寇圍城知縣錢奇加築康熙九年雨圯知縣井嶽重修

### 疆域

### 贛州府

廣四百九十里袤六百六十里東至福建汀州府長汀縣四百六十里西至南安府南康縣三十里南至廣東韶州府翁源縣五百二十五里北至吉安府萬安縣一百三十五里自府治至省城一千二百里

路程細數詳各縣

### 贛縣



附郭廣一百一十里袤二百六十五里

一東陸大路自縣東門過渡一百七十里至峽口鋪本府零都

縣交界一自江口鋪分路往西一百五里至窖塘本府興

國縣交界一西陸大路自縣西門過渡一百四十五里至

土扶鋪吉安府萬安縣交界一南陸大路自縣南門五里

亭九十五里至坳頭鋪本府信豐縣苦竹坳交界一自縣

南門過河南橋二十里至五總鋪南安府南康縣交界

一水路自東門東河贛關往上六十八里至峽口本府零都

縣交界一自信豐江口往右九十里至烏漾灘本府信豐

縣交界一自興國縣江口往左七十里至石窖灘本府興

國縣交界一自西門西河贛關往上四十里至歐潭南安

府南康縣交界一自西門由龜角尾一百十里至良口市

吉安府萬安縣交界

零都縣

在府東一百五十里廣一百里袤一百七十里

一東陸大路自縣東門慧明山五十五里至路口逕本府瑞

金縣交界一南陸大路自縣南門過渡七十里至义干鋪

本府會昌縣交界一西陸大路自縣西門生佛寺六十里

至峽口鋪本府贛縣交界一北陸大路自縣北門接龍庵

一百二十里至黃沙鋪本府寧都縣交界

一自葛坳鋪分小路往左三十里至蓮花山本府寧都縣交

界一自三觀鋪分小路往左六十里至公布小羅本府興

國縣交界

一水路自南門下河七十五里至峽口本府贛縣興國二江



口交界一自南門下河往上三十里至齊毛塘本府會昌  
縣交界一自白口塘往左一百三十里至曲陽江本府寧  
都縣交界

信豐縣

在府東南一百七十五里廣二百七十五里袤一百四十五  
里

一東陸大路自縣東門嘉定橋一百二十五里至重石堡本  
府會昌縣交界一南陸大路自縣南門一百七十里至東坑  
本府龍南縣交界一自楊馬鋪三十里至內江本府定南  
縣交界一北陸大路自縣北門迎恩橋四十里至苦竹坳  
本府贛縣交界

一小陸路自縣東門六十里至大湖墟本府贛縣交界一自

縣東門一百里至平坑本府安遠縣交界一自縣西門八  
十里至柯木坳廣東南雄府保昌縣交界一自縣西門五  
十里至嶺南安府南康縣交界

一水路自東門往下四十里至烏漾灘本府贛縣交界一自  
東門往上二百里至張公廟本府龍南縣交界一自縣北  
門往上一百三十里至分水坳廣東南雄府保昌縣烏迳  
市交界

興國縣

在府東北一百八十里廣二百四十里袤一百六十里  
一東陸大路自縣東門一百五十里至梅窖本府寧都縣交  
界一自縣南門雙橋五十里至石院鋪本府贛縣石窖塘  
交界一自縣西門七十里至均村吉安府萬安縣交界



一陸小路自縣北門七十五里至白羊坳吉安府泰和縣交界

一水路自南門三十五里至石窖灘本府贛縣交界  
寧都縣

在府東北三百六十里廣一百七十里袤三百十里

一東陸大路自縣東門七十里至白麻塘浮嶺本府石城縣  
交界一南陸大路自縣南門八十五里至大柏本府瑞金  
縣交界一西南陸大路自縣往西南四十里至黃沙鋪本  
府雩都縣交界一北陸大路自縣北門八十五里至竹篙  
嶺吉安府永豐縣交界一自黃溪村分路往左二十五里  
至梅窖本府興國縣交界

一小陸路自縣東門一百里至東龍本府石城縣交界一自

縣南門五十里至銅鉢山寺本府瑞金縣交界一自縣西  
門三十里至蓮花山黃千嶺本府雩都縣交界一自縣北  
門一百六十五里至土嶺撫州府宜黃縣交界一自懷安  
鋪往東北三十里至建昌府廣昌縣修嶺交界一自洛口  
村分路四十里至大樹嶺撫州府樂安縣交界一自張天  
塘村分路往西北四十五里至九子嶺建昌府南豐縣交  
界

一水路自縣東門外一百六十里至曲陽本府雩都縣交界  
一自江口分河往上八十里至龍下渡本府石城縣交界  
會昌縣

在府東二百里廣二百二十里袤一百三十里

一東陸大路自縣東門過渡十里至本府瑞金縣交界一西



陸大路自縣西門往北六十里至重石堡本府信豐縣交界一自縣西門八十里至油槽坳本府安遠縣交界一南陸大路自縣南門九十里至盤古隘本府長寧縣交界一北陸大路自縣北門過渡八十五里至水頭堡又干舖本府零都縣交界

一陸小路自縣南門一百里至盤古隘分路往左二十五里至上曾福建汀州府武平縣交界一自縣東門往左七十里至承鄉司本府瑞金縣交界一自縣北門一百五里至五龍堡本府安遠縣交界

一水路自縣北門外六十五里至安遠舖本府安遠縣交界一自縣東門五里排謝坊塘汛本府瑞金縣交界一自縣往南一百三十五里至羊角水汛福建汀州府武平縣交

界

安遠縣

在府南三百四十里廣一百里袤一百九十里

一東陸大路自縣東門四十二里至大陽關本府長寧縣交界一南陸大路自縣南門八十里至龍泉堡本府定南縣交界一東陸大路自縣東門一百三十里至油槽坳本府會昌縣交界一西陸大路自縣西門塔下寺一百里至五龍堡本府會昌縣交界一自縣西門六十里至坂石本府信豐縣交界

一小陸路自西門塔下寺往東南五十里至石背本府信豐縣交界

一水路自西門塔下寺二百里至安遠舖本府會昌縣交界



瑞金縣

在府東三百八十里廣一百里袤二百五里

一東陸大路自縣東門二十一里至大隘嶺福建汀州府長汀縣交界一南陸大路自縣南門雲龍橋八十二里至五里排本府會昌縣交界一西陸大路自縣西門一百二十五里至路口逕本府零都縣交界

一小陸路自縣往西南三十五里至黃安承鄉本府會昌縣交界一自縣往西北八十二里至羅漢巖福建汀州府長汀縣交界一自縣北門一百十里至蕉嶺本府寧都縣交界

一水路自縣南門六十四里至謝坊塘本府會昌縣交界  
龍南縣

在府南四百一十里廣一百八十里袤一百三十五里

一東陸大路自縣東門五十里至關西本府定南縣交界一南陸大路自縣南門一百五里至分水坳廣東惠州府河源縣交界一北陸大路自縣北門四十里至草嶺舖東坑本府信豐縣交界

一小陸路自縣西門一百三十里至東桃山廣東韶州府翁源縣交界一自縣西門過渡一百四十里至樟山峽頭嶺廣東南雄府始興縣交界一自縣南門一百三十里至油潭嶺廣東惠州府龍川縣交界

一水路自西門白雀寺六十里至張公廟本府信豐縣交界  
石城縣

在府東北四百六十里廣七十五里袤一百四十里



一東陸大路自縣東門三十五里至大菴橋福建汀州府寧化縣交界一西陸大路自縣西門四十里至梅坑舖浮嶺本府寧都縣交界

一小陸路自縣出西門四十里至東龍本府寧都縣交界一自縣東門五十五里至福建汀州府寧化縣交界一自縣南門九十五里至逕口福建汀州府長汀縣黃竹嶺交界一自縣北門六十里至分水坳建昌府廣昌縣鐵樹坳交界

一水路自西門七十里至龍下渡本府寧都縣合大江

### 定南縣

在府南四百六十里廣一百八十里袤一百八十一里

一東陸大路自縣東門一百八十里至小江廣東惠州府龍

川縣交界一南陸大路自縣南門一里至三台山廣東惠州府和平縣交界一北陸大路自縣北門一百八十里至內江堡本府信豐縣交界一自下歷舖分路往東北四十里至神仙嶺本府安遠縣龍泉堡交界

一小陸路自縣西門八十里至關西本府龍南縣交界

### 長寧縣

在府南四百二十里廣一百六十里袤二百六十里

一南陸大路自縣南門迴龍寺九十里至牛挨石廣東潮州府平遠縣交界一北陸大路自縣北門東華山五十里至盤古隘本府會昌縣交界一北陸大路自縣北門六十里至大陽關本府安遠縣交界

一小陸路自縣東門大悲閣二十六里至分水坳廣東潮州



府平遠縣交界一自縣南門九十里至和尚逕廣東惠州  
府興寧縣羅浮司交界一自縣西門九十八里至吉祥廣  
東惠州府龍川縣交界一自縣東門九十五里至烏戰碑  
福建汀州府武平縣交界

西江志卷第六

西江志卷第七

山川一

高山大川磅礴扶輿九土既辨乃列方隅我觀職方是邦  
闕如揚州鎮數會稽具區爰泝而上徵于夏書敷淺之原  
彭蠡攸豬厥名最古開闢與俱支條亘緜脈絡散殊桑經  
杜記或有或無凡屬境內眎茲輿圖作山川志

南昌府

西山在府城西距章江三十里水經注作散原山豫章記作  
厭原山道家第十二洞天名曰天寶極元峰曰大簫小簫  
簫史所嘗遊也又有葛仙峰下爲葛仙源嶺之最高者曰  
鶴嶺王仙跨鶴所也曰梅嶺梅福學仙處也曰鸞岡洪崖  
先生乘鸞所憩也宋余靖記云巖岫四出千峰北來嵐光



西江志 卷七  
染空連屬三百里西山之勢高與廬阜等而不與之接餘山則枝附矣周必大遊錄云以小舟絕江爲西山遊初至沙口井在章江西岸石頭之上陸行二十五里至貞觀院登閣觀禪月羅漢摹本又五里入上藍莊又五里至鸞岡三徐葬其旁稍前即翠巖也南唐保大間有澄源禪師無殷住此山其後死心居此而雲峰悅亦悟道故江西號爲勝地觀洪崖井深不可測舊有橋跨其上今廢寺引崖水以給用又匯其流激大輪爲磨院去崖數十步有奉聖宮今曰紫清徐鉉爲記又云乘小舟循溪依嶺行一二里望所謂藥臼者在石澗湍流中如石盤然次度牛欄嶺茶園嶺最後度湯家嶺回望生米洲乃至香城寺榜曰咸通香城蘭若東晉隆安中曇顯肇居此山過榷林一枝最大者

圍丈五號將軍樹相傳近千年矣次至硯石長一丈四尺闊六七尺次至靈觀尊者坐禪石次至屋壇是爲香城絕頂遠眺章江略見府城山後即江東建昌縣界遊洪崖資禪院去翠微十里而近度落馬嶺乃至本白石道者智新所居寢室窗外對梅嶺如屏障再過洪崖縱觀飛瀑而行了賢送別三徐祠下至江頭僅三十里前蓋悞而迂也

按樂史太平寰宇記西山本名南昌山自太平興國六年析南昌水西十四鄉置新建縣山因改屬焉宋贊皇李上交著豫章西山記一卷板本已燬新建徐世溥有西山志略及靈跡記

麥山在府城東南三十里一名脈山或作墨遠望山色如墨然



西江志 卷七  
斜山在府城南三十五里形家有面山不正之言因呼霞山  
相距數里為虎山

莓苔山在府城東南五十里又十八里為漸山竦如卓筆俗  
名尖山其陽隸進賢縣已上諸山屬南昌縣

雞籠山在府城西北十里其山枕江登臨最勝

釣磯山在府城西十里山廣百步四周皆水傳是洪崖先生  
釣遊處

雲蓋山距府城西五十里下有龍壽禪院又西十里為罕王  
山上有廟其神乃漢昭烈曾孫劉獲祈夢多應見宋姚勉  
碑記舊志作晉司馬儀蓋沿譌也

大球山在府城西南七十里山形雄特宛若獅蹲與小球山  
相連

逍遙山在府城西南八十里道家第四十福地山陽有許旌  
陽玉隆宮

卓山在府城西北六十里樵舍鎮上其巔有萬竹亭

牛首山在府城西北八十里隸新建儀鳳鄉又北鄉二十二  
都有棠岡山乃西山盡處也舊建棠岡書院今廢

李岐山在府城東北一百四十里鄱湖之西春夏水高其巔  
獨露往來舟楫值風濤者皆泊其下山舊有廟相傳神姓  
李因以名山又東北為几山上有石橋釣臺仙巖

吳城山在府城東北一百八十里臨大江上有望湖亭張令  
公廟順濟龍王廟宋大中祥符六年御製戒蛟文刻于石  
一云許吳二真君斬蛟處宋文信國天祥詩龍行人鬼外  
神在地天間



吉州山在府城西北一百九十里與松門山相對其上居民相傳秦時移此

松門山在府城北二百餘里枕鄱湖之東兩岸生松遙望如門山上有石鏡光可照人見寰宇記已上諸山屬新建縣

始豐山在豐城縣南七十五里高三百丈道書第三十七福地有藥臼洗藥池各二石壁上有白玉蟾影及手書江右福地始豐名山八字南唐徐鉉有記

羅山在豐城縣南一百四十里東接堯山晉羅文通學道於此中爲歐石巖其巔有池又名池山

澄山在豐城縣南一百四十七里產茶其下有水澄澈土人取水造麴色如丹砂一名孤山

杯山在豐城縣南一百五十里周迴百里形如覆杯豐水所

出

白馬山在豐城縣東南三十五里相傳晉世有三神乘白馬於此鄉人祀之

龍門山在豐城縣東南一百里西北與道人山接相傳馬祖道一駐錫於此前有七寶峰傍有龍湫

堯山在豐城縣東南一百四十里上有堯壇因名

鍾城山在豐城縣東四十里有景福觀前爲城岡山下有瀑泉數十泓大旱不竭

楮山在豐城縣東六十里產楮木有磐石可坐百人徐孺子讀書臺在焉旁有三角山

鳳皇山在豐城縣東七十里晉昇平四年鳳皇將九雛見於此相近有鵠仙山



梅仙山在豐城縣西十里濱大江相傳梅福隱此

磯頭山在豐城縣北十里下臨曲江宋姚勉詩曲江磯頭山

率律此景江南誇第一

壇石山在進賢縣治後相傳闢縣時得斷石有尉遲恭監修

五字其東為烏石山

三臺山在進賢縣儒學前一曰鳳臺一曰鸞臺一曰鶴臺下

澗常河九曲

麻山在進賢縣南二十里上有麻姑壇豫章志云晉王郭二

仙憩息之地後包真人於此昇舉有龍井禱雨輒應

鐘山在進賢縣西南五里一名上下破山二山臨水破裂元

大德間得銅鐘十二

英山在進賢縣西十五里臨青嵐湖有陽和天井傳與積烟

山通

金山在進賢縣西南三十里其下有淘金井山與臨川接界

榭山在進賢縣南四十里一名臧山唐臧嘉猷隱此山木冬

夏常青

巖前山在進賢縣東南七十里其巖一若獅一若象

棲賢山在進賢縣東七十里唐撫州刺史戴叔倫寓此因名

舊稱小天台山

北山在進賢縣北一百里地濱彭蠡四面皆水其土平厝利

耕作元伯顏子中隱此有啼鳥不知江國變多情到處勸

人歸之句

登高山在奉新縣治北一名龍山又名獅山下有泉名馮井

井上有倉城其頂平敞足以眺遠



陶仙山在奉新縣南十五里世傳陶安公乘龍上昇處  
藥王山在奉新縣西五十里豫章記晉吳猛騎虎入山處或  
云文簫吳綵鸞寄食鄒舉家俄跨虎仙去留藥一粒與主  
人且遺以詩一作越王山

華林山在奉新縣西南四十里半屬高安其山三峰秀拔土  
人常伺雲氣舒卷以驗晴雨南有浮雲宮及仙姑壇故址  
元至正間李普成王普敬明正德間陳福一羅長一皆據  
此為寇

九仙山在奉新縣西八十里上有壽堂禪院山北有湯泉一  
温一沸上有亭宋潘興嗣作記

晏嶂山在奉新縣西南八十里層巒高聳四面如屏山南有  
劉仙巖晉劉道成修煉所山巔有風洞穴闊二丈許風常

出焉

百丈山在奉新縣西一百四十里馮水倒出飛下千尺故名  
以其勢出羣山又名大雄山唐宣宗潛遊至此嘗賦詩山  
有草花如蓮名山蓮見明陳芹遊記距山西南里許有駐  
蹕山一名車輪峰宣宗迎回駐蹕於此又縣西南三十里  
有駕山其南為王見山皆以宣宗訪逸民鄒垣得名

吳憩山在靖安縣北五里世傳吳真君猛嘗憩於此相近有  
繡谷山一名幽谷山山半瀑布如練

金城山在靖安縣西北五里馬湖水遶其麓

葛僊山在靖安縣西北二十餘里按豫章志仙本楚人漢末  
隱此或云即葛洪也有煉丹壇壇之左有葛仙菴其巔有  
金鐘每遇風雨晦冥則有聲明正德間土寇胡雪二立寨



山上即瑪瑙崖是也

桃源山在靖安縣西北四十里勝槩宛若武陵上有仙姑壇及龍鬚藥臼車箱等九洞其水注下南與毛竹磔水合唐校書郎劉昫嘗居此號為孝弟鄉一云是宋支離翁劉子虛居址相近為石門山山有寶峰院唐權德輿有碑記又有名山洪芻祐聖院記云右鶴嶺而左名山長溪出焉洪屏山在靖安縣北七十里其山四圍壁立路止一線可通水潺石逼凜然可畏

黃茅山距靖安縣六十里許在礫坑忠夏兩都之間延袤二十里鳥道羊腸行者苦之

國朝康熙二十六年始建茶亭三十一年知縣高克藩復建庵於亭側

玉枕山在武寧縣治北其形如枕西有四望山高下相等

七里山在武寧縣西一里其山陡峻逼倚修江宋邑人李道宗於山腰鑿路約七里許歲久崩壞明弘治間邑人盛如江改鑿於下

武安山在武寧縣東南二十五里元季邑人胡紹遠兄弟聚鄉兵於此立寨

柳山在武寧縣西南四十里孤峰秀拔唐柳渾隱此

巖陽山在武寧縣南四十里相傳巖陽尊者結庵於此庵側有泉二泓自石間流出名石鑊泉

伊山在武寧縣北三十里俗傳伊叟拾蛇卵後成龍叟死龍湧沙石瘞之

石鏡山在武寧縣東北四十里其色黑形如鏡



遼山在武寧縣西七十里雄據上游為邑巨鎮

太平山在武寧縣西九十里與湖廣興國州相連鶴臯龍井勝跡頗多元揭後斯有太平山雜咏二十二首

魯溪山在武寧縣北七十里山枕魯溪之上石屋石田形狀不一世傳劉真人修煉處

朱家山在武寧縣南一百二十里接靖安界

楊新山在武寧縣東北一百四十里與興國州分水界

九宮山在武寧縣西北一百八十里其陰隸湖廣通山縣上有瀑布下有溫泉為西境之勝世傳有九龍降於池故名一云昔晉安王氏兄弟九人造九宮於此宋時方士張道清曾建欽天瑞慶宮於上謝文節枋得詩真人何代結幽棲累世奎光煥紫泥蓋紀實也

鳳凰山在寧州北二百步如鳳展翼乃州之主山也上有臺

曰鳳凰臺

南山在寧州南二里隔溪跨橋穿石竇而入懸崖峭壁下瞰修水有釣磯及玉溜石積雪石俱黃庭堅題字又南十餘里為壘金山有高岡亭飛龍閣招黃臺深澗曲流石門松徑頗擅登臨之勝

旌陽山在寧州東一里層崖壁立截修水口晉許遜逐蛟過此因名

雞鳴山在寧州西五里青峰峭絕每夜深風靜聞雞唱若天鷗之類山麓有謁仙亭又西為鹿源山上有九峰相傳仙人常乘白鹿出入其間

龍峰山在寧州東四十里狀類九峰下有龍峰院



毛竹山在寧州東南一百二十里勢連東津山按圖經此山路塞宋治平間余奭開鑿至爛泥坪始通往來

巉巖山在寧州西七十里山有四十餘穴每天晴穴內風出子午卯酉時尤盛相近有攝仙山狀如獅中有二巖巖各有穴其下有龍潭

島石山在寧州西八十里上有李仙姑壇歲旱應禱又西十里為桃峰山有雷巖石神像禱雨頗應

大湖山在寧州西一百四十里山巔有池廣六丈泉流不竭注下為百菖水

大幽山在寧州西南八十里中有金雞橋前後深淵曲澗明萬曆初為盜藪後勦平之

大瀉山在寧州西南一百五十里西通湖廣瀏陽縣東通新

昌縣南通湖廣興國州林木鬱塞盜賊淵藪明萬曆五年設銅鼓石營守備於此對面為黃檗山

黃龍山在寧州西一百八十里連湖廣通城縣一名輔山高千餘仞下有冷暖二泉山頂湫中有黃魚能致風雨歲旱禱之輒應吳黃武中黃龍見彼時屬武昌郡

幕阜山在寧州西一百九十里與湖廣通城縣相連高一千丈廣袤一百二十里吳都尉太史慈拒劉磐於此置營幕因名山上有石名繫舟峰有列仙壇匯沙池芙蓉池海棠洞仙人洞晉葛洪著山記一卷其東為青龍山相傳有禪師駐錫於此能馴猛虎里人結庵奉之

安峰在西山孤峭入雲宛若削成蓋簫峰之亞也相傳當暑無蚊蚋又有鷲峰石塚千層上圓平若鼓狀叩之比湖口



石鐘聲尤洪亮

上天峰在府城西北七十里其下有泓嶺谷泉石交勝

金牛峰在豐城縣東北四十五里相近為龍嶺伏嶺月嶺

香爐峰在進賢縣東南四十里狀如香爐時雨將作烟霧滃

然上有許旌陽祠

白狐峰在進賢縣西五十里上有袈裟巖摩雲頂諸景

仙壇峰在進賢縣東七十里其巔有仙壇歲旱禱之縣北二

十里有雙乳峰

迦葉峰在奉新縣大智院東其南為釋迦峰

謾母峰在靖安縣北十里世傳許旌陽會謾母於此其地桃

花夾徑上有石壇爐竈相對者為曹仙洞縣北又有白雲

峰二峰狀如了髻天將雨則其巔出雲

寶蓮峰在靖安縣北四十里唐釋馬道一卓錫之地貞元四

年建骨塔宋紹聖初真淨禪師亦葬此

桃花峰在武寧縣東三十里

七臺峰在寧州西八十里臺源之側

江前嶺在府城南七十里亦名躍龍岡

白湖嶺在府城南九十里下有白水湖故名

二嶺屬南昌縣

金嶺一名金丘在西山距府城三十里丁栖霞修煉所

緱嶺在西山距府城五十里隸新建遊仙鄉舊志云與鶴嶺

對陳弘緒寒夜錄云宋熙寧中王迪為洪州司理有仙術

跨鶴歷諸峰而去姓同子喬而跨鶴又同因以洛中緱山

名之又遊仙鄉太平鄉之界有吳仙嶺上有紫雲宮晉吳

猛修煉地其下為天師谷唐天師萬振勅葬杖履處



雷王嶺在西山距府城四十里中祀雷神一名靈峰嶺又東吳王嶺廟祀吳王孫策或云吳王濞鑄錢而祠之非也

桃花嶺在府城西北五十里隸新建桃花鄉明張文端位有詩家住杏花村身寄桃花嶺後少宰熊文舉得之有記云桃花嶺在西山四面如桃花不與衆山連屬最爲秀倩今屬新建裘氏種松萬株鬱然增勝

白仙嶺在府城西七十里祀宋真人白玉蟾

蜜嶺在豐城縣西十五里一名仙姑嶺高二百丈邑之屏蔽上有招雲石劍脊石下有蜜泉清冽甘美

連珠嶺在豐城縣西九十里高低聯絡如珠  
盤賢嶺在進賢縣南三里許昔朱子往泉州與友人呂伯恭盤桓於此故名

霧嶺在進賢縣治南百步環迤如帶元大德中縣尹趙銓鑿爲衢縣東五里黃嶺有泉注于大滿龍潭

野塘嶺在進賢縣東南六十里一名野塘峽巨石如盤西五十步有泉利灌溉

虬嶺在奉新縣東南二十里半屬高安上有漢劉繇廟狐尾嶺在靖安縣南爲縣治來脈其上有神壇

碎石嶺在武寧縣東三十里黃土嶺在縣西北一百二十里上坑嶺有二一在寧州南十里登其巔可瞭一州一在州之高鄉與鰲嶺相接

長定岡在府城南二十五里梧桐岡在府城東南三十里又東南十里爲橫岡其勢接旗頭岡橫偃而來當府城之上象尾岡在府城南四十里形如象尾相近有澹岡及隆岡宋



淳熙間進士劉邦本建隆岡書院其裔孫藏有朱子所題

四景詩

齊城岡鼻塔岡俱在府城東二十里以上諸岡屬南昌縣

翻車岡在府城西南四十里上有許仙廟事詳列仙傳

綵鸞岡在府城西七十里舊有會仙亭明祭酒胡儼詩相隨

一徑入煙蘿隱隱雲中尚踏歌

赤岡在豐城縣西北五十里界接新建瀕江壁立土石皆赤

朱子詩曉起清江弄小舟晚風吹過赤岡頭

拜虎岡在進賢縣北二十里明洪武初孝子包實夫拜虎處

邑人陳善有記縣東八十里有大小歇岡

鼓樓岡在奉新縣王見山西亦因唐宣宗得名

龍岡在靖安縣西四十里每歲旱禱有應

紫鹿岡在武寧縣東三十里與青牛洞相峙舊志云王子喬

騎紫鹿訪丁令威者妄也

洪崖在西山距府城四十里一名伏龍山乃洪崖先生煉藥

處有洞居水中宸濠嘗屏水見底有五井各方廣四尺許

洞側瀑布泉狀如玉簾歐陽修品為第八泉徐世溥遊記

云由江三十里抵洪崖兩崖石數十尋皆釜色時有白繡

紛若疊菊直上高五六里西山之水飛鳴而下從石壁橫

灑若疾風吹雨莫不斜飛左右有鐘磬兩石巨若輪橫無

所倚水東奔激之翁然為鐘聲若倚瀉西擊則鏗然若磬

春夏水瀾不復見但聞鐘磬聲也

雙泉崖有二一在寧州西一百二十里崖口可容百人內有

石類獅左右二石形如鐘鼓有池澄澈澇不溢旱不乾一



在寧州東泰鄉其中幽邃有水通武寧縣之康灘二崖禱  
雨輒應

仙蹟巖在府城西四十里西山凌雲觀側宋楊傑詩出塵舉  
天步踏石上雲梯

野狐巖在奉新縣百丈山後昔懷誨禪師開堂有老人聽說  
法曰墮落此山今有幸矣明日見老狐斃巖下

宴坐巖在靖安縣北四十里寶峯寺側宋素陟有詩

清水巖在寧州東北二十里南巖有石室北巖多蘭蕙黃庭  
堅云清水巖號為天下勝處

靈石巖在寧州西南一百二十里頂圓中空狀若懸磬疊屏  
巖在州西一百八十里修水之上

秦人洞在西山齊源嶺側徐世溥遊記云洞口容兩人稍進

可容十餘人沙石明淨水聲在上從洞中聽之若笙簧自  
天來矣前有石門限由限進三十餘步石門閉不可開窺  
之綠艸萋然多紫蜻蜓飛翔往來境幽窈舉火始可得徑  
昔有入者見石几胡牀之屬父老云世治則石門閉亂則  
自開以待隱者相近為鄢家山地僻民淳花香竹翠世溥  
亦有小記

天寶洞在府城西八十里西山最勝處洞門有石泉狀如水  
簾宋嘗遣使投金龍玉簡於此又有翔鸞洞石室敞豁可  
容數十人

潘仙洞在西山伍諫鄉翊真觀側傳是女真又洪崖鄉有逍  
遙洞道士張逍遙脩真處

海棠洞在進賢縣東七十里臧嘉猷讀書處



西江志 卷七  
投龍洞在奉新縣元秀峰南五里舊名浮丘石室乃浮丘公  
遊息處唐明皇於此投金龍因名昭宗時里人黃瑄得金  
簡玉環簡重四斤十二兩上有鏤文八十字宋大中祥符  
三年遣使復投金龍於此

李八百洞在奉新縣南三十里浮雲宮西洞口甚隘但可側  
肩而入行數十步漸高敞其深莫測相傳異人李真隱此  
自稱八百歲高安縣亦有李八百洞與此相通唐開元初  
孫天師智諒於此藏道書又名孫天師石室符載詩太極  
之年混沌闢此山亦是神仙宅後世何人來飛昇紫陽真  
人李八百

雷洞在武寧縣南八十里洞中常有雷興人不敢入  
鳴水洞在寧州黃龍山西南水行兩石間其高數十丈直下

聲如雷流十餘里始達平田宋韓駒有詩

石人洞在寧州西七十五里洞口有石如人歲旱禱雨以泥  
塗首輒應又州西南一百二十里有櫻桃洞

佛名石在西山齊源嶺下相傳石能為厲有僧鑄佛號於上  
故名又西山泉頂壇側有雞冠石

鎮蛟石在奉新縣延真觀內舊傳許吳二真君逐蛟入穴以  
巨石書符鎮之又旌陽試劍石在三十四都又有渚石臨  
水高三十丈上有字髣髴似印俗呼印山

了口石在奉新縣西南六十里浮雲山西一石分三尖

大義石在奉新縣百丈山大智令衆僧開田為說大義故名  
相傳師示寂時有石開一拳吾當再來之記後生紅柏一  
枝石因開焉



石柱在武寧縣西南二百里俗呼南山神石周迴二百五十步四面削成如柱

銅鼓石在寧州西南武鄉大瀉山石高數丈形類銅鼓

抱子石在寧州東十五里修水之濱石狀如人屹立前有小石二故名

章江在府城西章江門外一名贛水前漢地理志云豫章水出贛縣西南北入大江後漢郡國志云贛有豫章水酈道元云贛水北逕南昌縣城西又北逕龍沙西其水總納十川同湊一瀆俱注於彭蠡也舊志云章水發源最遠控引衆流至此故江獨以章名按洪乘編遺云唐代宗諱豫凡豫章上書者去豫止稱章則茲水在唐初本名豫章江也餘見南安府山川及水利志

劍江源出章貢由清江遶豐城縣折而西北爲劍江亦名劍水又東流入鄱湖

曲江在豐城縣東北十里形如半月分三潭岸傍民居繚繞榆柳成行水波之豔如盪金碧舊傳宋隆祐太后以金花投潭祈風又名金花潭

東湖在府城東隅水清魚美酈道元稱東太湖十里二百二十六步北與城齊南緣迴折至南塘水通大江者是也其後淤塞周廣僅五里歷代濬治詳見水利及藝文

鄱陽湖在府城東北一百五十里即禹貢彭蠡是也隋以鄱陽山所接故名鄱陽湖合受上流諸水周環數百里東至饒州府餘干縣之康郎山西至新建縣荷陂里南至進賢縣北山北至南康府都昌縣南宋王安石詩茫茫彭蠡春



無地白浪春風溼天際李綱詩群川已會江不湍朝宗到  
海東南安

瑤湖在府城東十五里又東三十五里為南湖源出進賢縣  
羅溪嶺又府城南二十五里有汝池湖

黃白湖在府城南七十里一名柏湖中有鳳溪山九龍井地  
識云兩水夾紅沙狀元出誰家湖田磽瘠明喻均有議復  
黃白湖田則碑記

金鐘湖在西山天寶洞上周廣三丈唐武后賜天師萬振金  
鐘玉磬後遺湖中湖有石榻存焉

百斤湖在豐城縣東十里溉田五百餘頃又東為株湖長十  
餘里溉田千餘頃

銅湖在豐城縣東二十五里上通豐富二水下接撫河

蛟湖在豐城縣西十五里源發劍池東北流五里許匯為湖  
流入長樂港灌田數百頃

蓮花湖在豐城縣北五里流遶縣治前即腰帶水

藥湖在豐城縣北五十里宣風鄉周廣四十餘里相傳真君  
許遜經此水蛭黏其馬足投丹湖中水蛭遂絕其北隸新  
建縣

軍山湖在進賢縣北延袤五十餘里有軍湖書院遺址又有  
日月湖水涸時分為二漲則合為一湖中有灘曰石人識  
云日月湖明良將出石人灘合狀元生明正德間舒文節  
芬應之

馬祖湖在寧州崇鄉相傳馬祖道一往黃龍山經此

蜀水在府城西南六十里本瑞州高安縣錦江東流入南昌



境合象牙潭水入章江舊傳晉元帝時大疫人詣許遜求  
療時為蜀旌陽縣令與水一器令投上流飲者皆愈故名  
按班固漢志已云建成蜀水東至南昌知傳者之妄也  
西洛水在府城東南七十里源出盱汝東北入武陽水又東  
北入宮亭湖

上僚水在府城西北一百二十里源出建昌縣逕奉新縣流  
至此一作上僚江表傳稱海昏上僚津有五六千家相結  
聚作宗伍惟納租布於郡吳志稱孫策勸廬江太守劉勳  
攻取上僚是也上僚有亭亭側有三百家見雷次宗記

雩韶水在豐城縣東南一百十三里源出撫州橫汜河西流  
入縣界隱溪水東流入之

富水在豐城縣東南一百二十里源出羅山流合豐水

豐水在豐城縣南一百八十里源出杯山舊由長樂港入章  
江每春漲江水逆入為患明永樂間耆民楊長和疏請設  
堤障之導其流入三溪津達中溪環邑南與富水會至小  
港口入章江

院澤水在進賢縣東南五里源出柵山匯於臧溪蜿蜒九曲  
繞學前合通濟港流入青嵐湖

三陽水在進賢縣北六十里以南陽洞陽武陽三水合流入  
鄱湖故名

馮水在奉新縣南一百五十步源發百丈山圖經云昔漢徙  
江東馮氏之族於海昏因名

龍溪水在奉新縣西二十里源出藥王山流經縣界南合馮  
水梁天監中獲四目龜于此



華林水在奉新縣西南四十里源出華林山縈紆至縣東馮田渡與馮水合

大橫溪水在靖安縣寶峰寺側宋袁陟詩昨日溪橋上潺湲已可聽

磧溪水在武寧縣東二百步源出雙嶠山繞城而西又南入修水今已失其故道詳見水利志

鳳口水在武寧縣東北七里其水發自三港修醴水在武寧縣西四十里源出大孤山入修水

修水在寧州西六十里源出黃龍山納眾水東北流六百六十里入鄱湖以其修遠故曰修水水經注訛為循舊傳郭璞識云有水名修有魚名儵天下大亂此地無憂見宋洪芻職方乘

鹿源水在寧州西八里源出高鄉

鶴源水在寧州東北七十里發源湖廣九宮山南流與修水合嘗有群鶴飲集于此故名其自境內西流入湖廣平江縣者乃汨水也水經作潁水

杏苑水發源寧州幕阜山流經查田津入修水

睽溪在府城東南一名自家溪周四十餘里

曹溪在府城西南八十里其派分自三江流至萬舍合西洛水

槎溪在豐城縣南八十里源出猴峰西流經黃金橋入文江

過黃沙瀝烏石岡隨地築堰三十餘所利灌溉晉范太守甯得靈槎于白石墓故以名溪

杭溪在豐城縣西源出介山匯于藥湖又會筠河入劍江



羅溪在進賢縣西二十五里羅溪嶺下

藏溪在奉新縣西十里延真觀側

雙溪自毛竹山發源一歷南源達迨里一歷象湖達桐城二水遶靖安縣而流故名雙溪

義溪在武寧縣西一百里源出西港昔有周姓者七世同居故名

紫陽溪在寧州雙井下黃善所居之地

象牙潭在府城西南八十里其洲灣繞狀類象牙明解縉詩西去一山如翠帶舟人說是象牙潭

生米潭在翻車岡之東上有生米市世傳有人投生米于潭中捕魚不覺行入一石門煥然明徹見白鬚翁曰此非汝所宜來漁人遽出登岸入水已三日矣或云此即西山天

寶洞南門也一說旌陽僕夫許大覆車遺米於地米皆復生故名

化龍潭在豐城縣西南七十里

蘆蒿潭在進賢縣北八十里其水通臨川縣積煙山龍穴宋淳熙間舟人見五龍升降其間翼日乃雨

馬投潭在奉新縣西四十里中會村俗傳司馬頭陀於此潭赴水從頭陀山寺後井中出今呼爲司馬井

泐潭在靖安縣寶峰寺旁潭中有石如木魚擊之有聲有石如硯注水一泓四時不竭

龍潭在武寧縣西一里其深數丈宋詔建放生池於其側近岸有磐石名龍潭石臺又縣南一里有節婦潭

犀津潭在寧州西三里一名西津壁間有白石狀若夜月倒



影于水過客疑以為寶盜鑿之其影遂滅

石池潭在寧州西四十五里黃庭堅詩吾家溪潭動百咫坐見游魚可倒指

石掌灘在靖安縣西四十里其水出桃源山南流五里入雙溪

三洪灘在武寧縣東七十里亂石縱橫其勢最險又有東渡灘鳳口灘鹿角灘徐灘車頭灘空灘鷺鴛灘俱在縣東新縣灘在武寧縣西三十八里唐景雲間新遷豫寧縣之側又有張家灘梅瀨灘惡瀨灘抖擻灘大湖灘牛渡灘蘆陂灘渠良灘醴溪灘桃林灘影灘新開灘斜石灘俱在縣西大小神灘俱在寧州泰鄉高城灘在寧州高鄉故西安縣城之側又洪水灘在寧州西九十里

潭源在府城西五十里隸新建忠信鄉自簫峰下流為西山七源之一

白石源在府城西三十里源出梅嶺下灌田四百餘頃相近有銅源唐光化中銅溢鍾傳採以鑄鐘磬又有吳源其水自西山風雨池奔注灌田千餘頃

黃源在府城西南五十里簫峰下縈流六十里合蜀水入象牙潭宋袁陟詩買田簫峰下結茅蒼松根寄謝昇平時歸興在黃源

香城源在府城西八十里發源香城山曲折注于洪崖入鸞陂

慨江口在府城北八十里源發寧州逕建昌縣又東流至此與章江合漢昌邑王賀徙海昏每乘流東望輒慨憤而還



故名俗譌為漢口

白沙口在府城北樵舍下西北流經昌邑王故城東南至神塘湖轉流入慨江口

龍沙在府城北帶江酈道元云沙甚潔白高峻而陲有龍形連亘五里中舊俗九月九日升高處也唐權德輿詩龍沙重九會千騎駐旌旗宋潘興嗣詩五陵無限人密視龍沙記

南浦在府城廣潤門外置南浦驛濱江有湫龍湫

青雲浦在府城南十五里產異花名七里香有梅仙祠

龍湫在豐城縣西南三十里眾峰坳處內有蟄龍雖積雨久旱水無增減中有石色深黑可琢為硯

百花洲在府城東湖內宋紹興間轉運副使張澄建議講武亭

于洲上遺蹟久廢

國朝康熙戊戌修葺竣工繞湖甃石画檻紅橋有古講武堂滄浪亭諸勝

蓼洲在府城西一里南塘灣二洲相並水自中流入章江有民居數百家一名谷鹿洲酈道元云贛水又逕谷鹿洲即此北堂書鈔作鞬臯洲云是呂蒙作勾鹿大鰲處

黃牛洲在府城西南十里相傳蛟精為許旌陽所逐化黃牛於此又西南十里為吳家洲在對岸沙井之上又有滕家郭家二洲

鳳凰洲在章江中自章江門外橫阜經夕佳樓抵石頭口如鳳翼然

楊子洲在府城西北隅章江中周廣二十里洲上有唐李承



西江志 卷一  
三  
鼎廟形家言三墩九洲皆順水砂惟此洲為水口逆關舊有江天閣龍華塔俱廢

苦竹洲在豐城縣上游十里許其洲多竹昔陳高祖霸先遣周文育帥師擒歐陽頎於此

三洲在豐城縣北小港之外上楊林中牛宿下金雞識云三洲相連必出狀元

龍霧洲在豐城縣北四十里中皆橘林今稱金鐘口相傳宋世有漁者得一金鐘博識者謂為宣和故物洲左有羸螭石

龍馬洲在進賢縣北四十里軍山湖畔又縣東北四十里有迴龍洲宋淳熙中獲白龜於此

漉洲在武寧縣東十里又縣南十二里有費家洲縣東七十

里有團洲

馬家洲在寧州南一里舊有黃庭堅祠

洗馬池在府學右職方乘云是漢灌嬰飲馬處明御史張謙命工浚鑿改物華樓為書院萬曆間改為巡撫劉光濟仁政祠今祠左有小池是其遺蹟

墨池在南昌故縣治東梅福故宅內後入太乙觀

石臼池在樵舍池側有石如臼俗傳許旌陽擣藥處

泣冰池在府城西南松湖鎮孝子陽霖泣冰處事詳元史虞集亦有記

放生池有二一在東湖之西唐先天二年都督張廷珪奏置一在石頭津有宣城守周擇從記

劍池在豐城縣西南三十里晉雷煥掘獄得龍泉太阿二劍



西江志 卷七  
處梁陰鏗有詩

九子池在豐城縣東南苦竹村相傳鳳皇將九雛飲此

九龍池在奉新縣浮雲宮前宋胡仲堯創華林書院學者嘗

洗硯於此亦名墨池

天澤池在靖安縣治後宋邑人舒邦佐所鑿

磨劍池在寧州有二一在州治東隔修水一里一在州西二

十里舊傳許旌陽逐蛟于此磨劍宋蔣之奇有詩

青龍沼在武寧縣東三里嘗有青龍出此因名又桃花峰側

有丹沼

馬跑泉淺沙泉俱在府城北舊薦福院敷佑廟壇下北曰馬

跑水極清冷南曰淺沙深纔二尺冬夏不竭

孝感泉在豐城縣道人山聖乘院內宋紹興元年少卿曹戩

寓此其母喜茗飲初無井戩齋戒虔祝斲地尺餘泉忽湧  
出人以孝感目之

給事泉在豐城縣智度院宋紹興間給事胡安國與子寅寓

此愛其泉美常汲之故名

上泉在武寧縣東北六十里利灌溉

分水泉在武寧縣東北七十里梅崖山西流七十里至湖廣

興國州入楊新河

溫泉寧州有三一曰石壁溫泉一曰白沙灣溫泉俱在武鄉

一曰長茅溫泉在安鄉

龍井有二一在南昌鍾陵鄉慈雲院內每風雨井水常鳴一

在城東南總持寺春夏不增秋冬不竭

蛟井在府城西故上藍院一名橫泉相傳許旌陽逐蛟蛟奔



於井又云梁葛鰲宅東南井中有兩龍鬪半月不解鰲懼捨宅為寺今南昌縣治也

鐵柱觀井在府城廣潤門左舊傳井與江水相消長中有鐵柱許旌陽所鑄以鎮蛟螭考鐵柱有二其一在西山雙嶺南明宗濂有鎮蛟靈柱頌

魏夫人丹井在建德觀井覆以亭夫人即南嶽紫虛元君晉世修真于此彭真人丹井在宗華觀南宋宣和中浚井得石匣內有小金盒貯二丹

咒劍丹井在府城外蓼洲妙濟觀內

謝公井在府城東山寺相傳靈運于井側注老子等經唐泉井在府城孚應廟有古槐傳是唐崔隱士手植或云廟神即崔子玉以輔佐東嶽而祀之也

沙井在府城章江門外石頭津上許旌陽有江沙掩井吾道復興之識

八角井在小石頭西五里世傳鎮南節度使鍾傳家井

鹿井在府城西南七十里久駐村井在溪中天旱溪涸井乃見紫石迴旋膚色光瑩石罅中清泉湧出以烹茗輒成紫色曾有群鹿飲其中故名

梅仙壇井在豐城縣西北十里相傳梅子真嘗窖丹砂於此井水所漬多化為禹餘糧土人呼為石中黃

聖井在進賢縣舊麻姑觀東乃包真人顯蹟處優游井在崇真觀臧嘉猷所鑿張道姑井在明心寺水或五七年一湧劉真君丹井在奉新縣昭德觀晉劉道成煉丹所宋元豐七年蘇軾過此題云五月九日寓新吳同縣令李志中謁劉



真君祠酌丹泉飲之即此井也久堙  
在月臺上明弘治間知府祝瀚掘井數丈得印劍各一劍携去印存本觀

涂七公井在奉新縣東六十步長街之南七公廟前初七公卜徒縣治為民鑿井象七星此井水尤甘

法藥井在靖安縣法藥院內相傳馬祖道一鑿池出水以飲疫者

泉井在靖安縣石馬都上林其泉望南東流灌田四百五十畝

雙井在寧州西三十里黃庭堅所居之南溪心有二井土人汲以造茶絕勝他處庭堅有送雙井茶與蘇軾詩又州南三十步掘二井以制火災亦名雙井

義井在寧州西三百步宋時陳氏八百餘口同爨汲此

西江志卷第七



西江志卷第八

山川二

瑞州府

碧落山亦名鳳皇山在府治後上有碧落堂相傳唐武德時應智頊刺郡鳳皇集於此山故名

小洞山在府城西北府學之右宋蘇轍與知軍毛維瞻探菊有句云菊花金粟未曾吐桂酒鶯兒空自黃明景泰初知府夏泉建清風亭

逍遙山在府城西北唐元和十年徙元陽觀於其上宋改為妙真宮有仙人李八百葫蘆井

大愚山在府城東南朝陽門外山麓有真如寺宋呂祖儉上書忤韓侂胄安置韶州遇赦移高安寓此因號大愚叟



龍化山在府城西南上蔡門外舊傳東晉時有龍乘雲化去故名

龍珠山在府城西北五十里下有石圓如珠更有奇石生成以易二字倒插凌霄文士多以易發科甲

白鶴山在府城西北七十里世傳東晉時仙姑丁秀英乘鶴飛昇舊有白鶴觀又西北為高胡山宋幸元龍壇記云陳夫乞萃徒輔高祖論功封高胡侯子程襲爵無後國除鄉里立廟祀之早禱如響有永平二年斷碑可辨又白雲山山下有超果寺東西兩澗瀑布泉流柳州教授孫伯溫有記謂之小麻姑

社山在府城西四十里豫章記云南有樟木枝葉鬱茂上多奇鳥棲止土人異之立為社壇歲時祈禱又西為蓮花山

峰巒攢簇如蓮花又西為坡山因東坡遊此得名

西龍山亦名鷄籠山在府城西四十五里高數百仞蜿蜒起伏如龍上有仙壇下有古洞天將雨則雲霧以興

鳳嶺山在府城西七十里方輿記云刺史應智頊嘗屯兵其上嶺勢峻拔遠望如鳳相近為飛霞山相傳豫章吳真人猛修煉之地每齋醮有鶴數百棲息于此旬日乃去復有彩霞覆之

米山在府城北二十五里其平坦通行處名米嶺豫章記云四面流泉土地膏沃生禾香茂為米精美唐武德七年因產香米奏改州名為米州

華林山在府城西北八十里半屬奉新境華林實錄云西王母第九子元秀真人於此築壇以祭靈仙隋大業末應智



項遣義軍羅武於壇西立三將軍廟後遂號為羅武廟其山絕險元明盜據為巢詳見武事志

荷山在府城南二十五里其前為琴嶺豫章記云池有紅蓮昔仙人王子喬駕白象來遊象化為石名白象石今山巔有丁王二仙壇下有棲霞觀黃金城亦名小浮丘明廖暹有荷山賦陳邦瞻作荷華山放歌

釣山在府城南三十里山巔有劉仙翁洞又南十里為羊山俗名石炭嶺宋山川記云山產燃石以水沃之即燃措鼎可烹

敗伏山在府城南一百里方輿記云陳武帝與賊戰此破其伏兵故名

蒙山在上高縣南三十五里方輿記云峭壁橫險厥材千尋

常有白雲清靄蒙蔽其上宋慶元六年有銀鉛坑冶後復置銀場提舉司以礦絕而廢山有瀑布泉分為二派

末山在上高縣西六十里東連九峰唐人云韞映迴合迴出雲末故名有道詮禪師道場宋阮閱詩有九峰深處古禪關之句

靈峰山在上高縣南二十五里舊傳風雨晦冥之夜山有赤光其大如斗號曰金雞土人以為神即其頂立靈峰廟相近有寶雲山巉巖翠靄中有僧廬曰寶雲院

鏡山在上高縣東北二里許其山有三端圓如鏡中一徑通行者兩山對峙如門縣治之後照也其下為鏡溪又縣治北十步許有觀山登之可望數里縣東水南五里許有屏山其勢連亘若屏



石潭山在上高縣西五里許山下潭中心有龍門石灣溪水口相近者為柘湖山麓坦夷鄉人栽柘以飼蠶遇蜀水秋漲則瀰漫如湖又有小水山橫長七八里許起伏如浪鐵索山在上高縣西二十里形有九十九股

桃源山在上高縣西巋然如屏春月萬花爛然宋幸元龍號曰人世仙境大書小桃源三字以顏之西有西嶺三峰聳拔狀若筆架南有天嶺行者若登天然北有大王嶺石峰插天

萬石蒼山在上高縣曲禮里之水口高數十仞大可數百圍其石紫而光潤四源十坑之水皆潄於石蒼之下而東石蒼之外有圓峰十餘如貫珠焉

櫟頭山在上高縣西一百里抵袁州萬載界

白馬山在上高縣北十五里舊傳有白馬噬草山頭人至輒奔騰而沒鄉人異之因名

顧城山在上高縣西北十五里相傳昔有顧王都其上每歲仲冬鄉民相率祀焉按山南二里有古屯軍營則顧城乃故城之訛也

黃岡山在新昌縣西八十里山勢峻拔為縣內諸山之祖明萬曆間賊據為藪因具題封禁

三台山在新昌縣學桂峰第一樓之北縣治南有案山今名綠秀山其下有澄潭

桂林山在新昌縣東二十里舊傳陶淵明所居

尉山在新昌縣東北七十里舊傳漢梅福為南昌尉上書言事不報攜妻子隱此宋幸元龍記云新昌有小溪溪有橋



曰迎仙西行六七百步曰尉田子真所嘗田也田去宅仙觀半里許唐代改祠為老子宮歷宋開禧乃復焉

靈源山在新昌縣東六十里蘇轍有句云三年欲到官為礙  
百里相望意自通蓋擬遊洞山靈源未得也狀元姚勉居  
山下其地名天德鄉

石臺山在新昌縣南二十里下有清涼院東坡子由嘗遊此  
有詩又南十里為志留山舊傳梁時志公駐錫於此下有  
定慧院

螺山在新昌縣西十里俯瞰螺灘有東列螺西列螺俗呼贛  
山

鳳凰山在新昌縣北三十里層巒聳峻下有仙人石在新會  
市之溪濱相近者為雲溪山其下有度門院山幽泉清宋

聶昌龔端讀書於此

章平山在新昌縣西北三十里瀑泉穿石飛雪數仞

吉祥山在新昌縣北五十里一名瑞雲山唐悟本禪師居此  
上有聰明泉下有吉祥院

八疊山在新昌縣西北九十里方輿記云疊嶂縱橫斷而復  
聳故名山接奉新及寧州界

五峯山在新昌縣西北一百里上有歸雲積翠羅漢月桂佛  
巖五峰故名中有瀑泉高懸如布宋崔鷗嘗遊此尚書倪  
思詩千巖萬壑爭獻狀秀色寒光奪人目

黃檗山在新昌縣西一百里山之絕頂有寺曰鷲峰唐宣宗  
龍潛時遊方至此嘗與黃檗禪師觀瀑布因共聯句一名  
鷲峰山



台峰在府城西北三十里斜溪之西三峰如台星故名  
慈雲峰在府城西北六十里宋張商英曾遊此有詩

碧雲峰在府城西南八十里上有雷祖殿其側有祈夢館又  
有員嶠峰在府城南八十里與清江縣接界

九峰在上高縣西四十五里末山之東北其峰有九曰雲末  
飛雲香爐翠霞蒼玉芙蓉清流蛾眉天竺皆奇聳峻拔東  
有靈龜洞後有羅漢洞宋蔣之奇漕江西嘗遊此明鄒文  
莊守益開叔講堂皆有詩

多寶峰在上高縣南三十五里蒙山之下宋慶元間銀鉛大  
發故名

烏峰在上高縣南七里上產烏藥故名又距縣二十五里有  
梅峰禱雨立廟

折桂峰在新昌縣東門外尖聳秀特俗呼火焰山宋縣令劉  
明老剗平其巔以息火災明成化間知縣羅贊培之亦不  
為災

石鼓嶺在府治西與府學對峙下有潭上有石鼓及卧牛石  
明正德間知府鄭璠伐石壘塔其上名筆峰今廢

主嶺在府城西北近華林山有南北嶺三寶嶺皆山勢危峻  
明正德七年官兵分屯於此以討華林山盜諺云若要華  
林敗三寶去立寨

馬鞍嶺在府城東二十五里宋景定間民多避亂於此

曦嶺在府城西南三十里府學門對之峭峰如畫又西南二  
十里為虎跡嶺相傳晏仙騎虎飛昇之地石有虎跡  
蔭岡嶺在府城西南八十里墟市設巡檢司



李家嶺在府城西北六十里下有石洞鄉民嘗避寇於中有  
插天石形如筍高七八丈

敖嶺在上高縣北三里即鏡山最高處也方輿記云晉敖真人得道之所上有磨劍石煉丹竈

蓬萊嶺在上高縣西六十里相近有刁嶺又有石嵩嶺奇石  
聳如嵩嶽故名

黃鳳嶺在上高縣西九十里俗傳昔有黃鳳集此

寶珠嶺在上高縣南三十里相連蒙山世傳道明禪師自庾

嶺來卓錫夜以寶光珠照十方故名嶺與新喻縣連界

浮樓嶺在上高縣西一百里末山之西山峰秀拔下有小溪

俗以其形如樓之浮水故名其山半屬袁州萬載縣

銅釘嶺在上高縣西靈峰山側一名銅精嶺俗傳許旌陽以

### 銅釘釘蛟於此

謝君嶺在上高縣西千春南鄉亦名大烏尖嶺高數百仞舊  
傳謝仲初於此得道謝本萬載人嘗尋真躡其嶺

袁州嶺在上高縣南九十里末山之南其嶺至分水界屬上  
高界外屬宜春縣

倉庫嶺在新昌縣東南五里五鹽嶺在縣治西南二里合鹽  
泊鹽洲鹽渡鹽溪鹽步為五故名

石門嶺在新昌縣北二里里人蔡疆鑿石開途以便往來如  
門雙峙縣有八景石門長嘯其一也

黃茆嶺在新昌縣北二十里脈自章平山來上有楓樹三株  
大丈餘雲氣磅礴絕頂鑿石通道宋淳熙間有龍見居民  
羣聚鼓噪龍投山下須臾地裂水涌近山田宅決沒為湖



者數頃因號其地曰龍破

金剛嶺亦名萬松嶺在新昌縣北五十里上有洞山寺後為雲峰壇相傳智慧禪師種萬松於此每種一松輒誦金剛經一卷故名又縣北有彭祖嶺姚雲詩彭祖嶺頭春草生逍遙洞口暮煙橫

西嶺在新昌縣東北六十里形若拜舞俗名攀龍山又東北十里為北嶺峰巒萬疊中有瀑布又東北二十里為三聖嶺

大姑嶺在新昌縣北八十里與八疊山相連縣之關隘宋元設巡司於此上有仙姑剪刀石

雲峰嶺在新昌縣西北九十里其山性腴四時之菜自生上有龍潭真武壇張梅二仙壇及仙人石跡又西北十里為

分鄉嶺接南昌寧州界其下有溪

五龍岡在府城西下有潭深數仞上有廟先祀漢潁陰侯灌嬰後祀刺史應智頊今為城隍廟

龍岡在府城東一里梁太清間為龍岡寺唐即其地建靖州今為禪寂院

退田岡在府城西北二十里相傳兄弟有訟田者至此而悔故名又西北二十里為青石岡暴雨後有石錢石磨等物如指頭大者甚多

舉子岡在上高縣西六十里唐進士易重居此相近為天則岡土高一丈八尺岡南有遺甓故碑俗云古王者墓

旺賢岡在上高縣北二里學宮後鎮一名黃田岡

紐繚蒼岡在上高縣南二十五里法忍寺北相傳許旌陽煉



丹於此山湫有蛟魅護為淵藪輒作洪水衝漂丹室乃遣  
神兵擒之釘於石壁寺前有丹井大旱不竭上有行祠產  
無名子

赤珠岡在新昌縣東八里產紅珠又縣東南二十五里有柘  
木岡

蒙巖在上高縣蒙山下有二石洞相望數百步能出雲為風  
雨歲旱禱焉上洞不可遊玉沼當戶俯視惴慄下洞虛豁  
其廣函丈深不可究又有巨石屹立巖間上下無所附謂  
之無根石

荔枝巖亦名龍巖在上高縣九峰寺前有石盤其上生石宛  
似荔枝有洞曰龍洞

靈巖在新昌縣三十七都亦名天隱洞石像甚奇右折百餘

步有石巖青質白理隱成佛字拭之愈顯

春洞在府城後碧落山每遇立春日陽氣吹灰出外以雞鷲  
羽貯其中輒軒舞而出諺云袁州更鼓瑞州春指此

迷仙洞在府治後即碧落洞又名李八百洞閉塞不可入蘇  
轍有洞門藤蔓鎖煙霞之句紹興壬申州守羅薦建屋洞  
旁

四基洞在上高縣南一百里舊志云洞基占上高宜春分宜  
萬載四縣界故名明一統志作四溪洞

慈光洞在上高縣西四十里緣梯而下有門可入內可辟兵  
壁間題云唐乾符二年黃巢作亂在此逃避相近有鄧敖  
二仙洞

真遊洞在上高縣西五十里潤溪泉之側洞極深廣有佛像



石乳及石碁局又西十里爲石含洞洞有井鄉民歲首以  
火燭井水溢歲豐涸則歉旱

龍王洞在上高縣西茆岡有泉流出早晚黃濁與潮候相應  
有石可坐百衆距縣百里許幽僻未經品題

小石龍洞在上高縣上馬湖之右其山形勢如屏洞窈黑非  
炬莫行傍有兩臺酷似龍頭角鱗甲具備禱雨多應

龍泉洞在新昌縣西十五里俗傳源出離相院穿地十里乃  
出流於溪宋大觀中崔鷗遊此有記

九宜洞在新昌縣西北鹽溪中有靈石自成峰巒水涸可觀  
雲氣上浮則風雨至

桃花洞一名雷孚洞在新昌縣北二十里澗壑幽邃明里人  
熊翀子經臣結茅居此號楓山逸叟

呀口石在府城西北近華林山明正德間劇賊陳樞一自詭  
其神殺人祀之用以駭衆

火石在府城北調露鄉其石黑色如鐵舊傳丁仙姑煉成者  
丁氏覆以亭世紀之高安志云宋丁綱知韶州任滿載還  
其說爲允

金石在上高縣儒學前上有三丫司馬地鈴云金石口開丞  
相出羅漢石在縣東羅漢院側相傳江漲石隨水長

葫蘆石在上高縣南十里狀如葫蘆又縣東二十餘里有白  
面石以形似人立故名

厭水石在新昌縣東五里其石高五尺徑一丈相傳許旌陽  
立此以厭邑之水災

夜合石在新昌縣東北五十里洞山寺水口相傳其石晝開



夜合今不復然

顧淵石在新昌縣西南三十里半入凌江嶙峋高聳明成化間豪民漆姓伐石燒灰學使鍾城給榜禁止

錦江舊名蜀水自袁之萬載發源至上高合新昌水入江經府城東匯南昌之象牙潭入章江諺云錦水入市河朱紫滿城多蓋錦江貫南北兩城之中分一支入南城也

鐘口江在府城南三十七里源發荷山入錦江梁時人於此獲古鐘九乳形制奇古因以名江

凌江在上高縣南發源袁州萬載八疊山於龍河渡東流分脈經縣城與滕江合流經府城入章江

崇浦江在新昌縣東四十里太平鄉諸水合於此經上高出安塘河入錦江

滕江在新昌縣北三十里天寶鄉諸水合於此達鹽溪出凌江口入錦江

清湖在府城東十五里其水四時清瑩明巡撫韓雍訪隱士朱孔彰於此楊潤撰記

蔣家湖在府城南稅課司之下又城東南有陳家湖市河經其中又白練湖在高安縣治後

平湖在府城南十五里有鷺橋鷺峰諸景又南五里為珠湖世傳丁王二仙遺珠於此

藥湖在府城西南二十五里相傳呂仙曾遺丹故湖蛙不鳴李攀龍詩丹藥異人遺湖天蛙聲廢銅湖在府城高安縣信義鄉注田數千頃接豐城縣界

白家湖在上高縣五里許灌田甚廣



白澤湖在新昌縣東二里相傳許旌陽洗衣於此至今水不  
污濁一名濯湖縣北十里有松湖舊有熊氏花圃

龍口水在府城西南六十里源發蛟湖北流至花園渡入錦  
江一名談口水

華陽水在府城西南一百里有小溪自新喻縣界流至華陽  
北入錦江

隱泉水在府城南釣山之東北泉沸湧出于平田自三十六  
陂流出曲水橋入清江界合贛水

曲水在府城南六十里發源蒙山流出潦澣口東入贛水其  
勢迴環縈曲故名

鳴水在府城西北六十里北流合奉新江華陽實錄云碧澗  
飛流空谷振響絕頂有石高數丈以物扣之其聲如鼓

斜口水在上高縣西十里發源蒙山合末山九峰水歷深村

斜陂入江

六口水在上高縣北十里源出上夫西流南經河西陽樂花  
陂至六口入江

石洪港水在上高縣東十里源出上夫東流南經辛城合沙  
溪武泉至甘羅渡入江

易樂水在上高縣西南一百二十里源出乾陀嶺經永平至  
紫府口入江

章舍水在上高縣東北三十里源出新昌縣黨田塘浦經黃  
塘至廣樂城頭入江

白竹港水在新昌縣西四十里源發高嶺南流經上高縣入  
江



小斜川在新昌縣西南二里翰苑臺之下縈迴曲折入於鹽溪宋僧覺範以其風景類潯陽斜川因名之元至正間典史羅思敬構亭於上劉湏溪作記

市溪在府城錦江水自靖安門流入城經三讓橋世濟橋迤邐而東出朝陽門復入于江宋寶祐癸丑惠政橋成有錦水市河連之象是年姚勉及第歲久湮塞明正德八年知府鄺璠濬之可通小舟嘉靖乙未太保吳山及第

碧溪在府城自幸龍王廟前流經通真橋至府學前入江務農溪在府城東三十里其水自新建縣界至高安縣境南流入江

鹽溪在新昌縣西太和門外一名若耶溪上有鹽洲西溪自寧州發源至新昌縣一百五十里回繞而東入上高

縣東溪在新昌縣東北源出奉新界流入上高

方塘溪在新昌縣西四十里發源黃磔山流入上高

秀溪在新昌縣十五都今名查溪相傳晉陶潛第五子佟居此有淵明讀書堂靖節橋遺蹟

末山潭在府城米山西潭極深險舊傳有巨牛赤尾陰晦輒出傷禾稼人畜應刺史智頊除之塞其潭蘇轍詩人言西有蛟蜃穴閏年每與風雨俱

幸龍王潭在府治西五里幸氏譜云唐祭酒南容五世孫潭字子淵有異術經汴都嘗致書于鄉人曰城北門數里有潭傍有古木即吾家也叩之必應持書者如所戒果有二童子出俄一丈夫繼之宛如汴都所見邑人異之為立廟歲旱禱雨輒應歷代勅封龍王舊志作幸南容者悞



樟樹潭在上高縣治西儒學前一名學潭大江淵靜為巨鱗窟宅鳳潭在縣西五十里雲末峰之巖下

龍潭新昌縣有三一在二十九都雲峰壇一在三十都元道觀一在四十都黃檗山

鮎魚洲在府城東二十五里當錦江水口之衝中流突起竹木縈迴春夏水溢洲隨水長秋冬四周白沙如雪上有樓閣可供遊眺

鸕鷀洲在上高縣羅漢石東司馬地鈴云鸕鷀洲合狀元生又月沙洲亦名狀元洲在縣東二里許

國朝康熙十年知縣梁淑乾倡議建塔於上。仙姑洲在上高縣西六十里俗傳有女仙經此。祿陂洲在新昌縣東南舊儒學之左

進龍池在府城東縣學之右南流入錦江舊為學池棄以畀民明正德十年知府鄺璠復取隸本學又府城鍾秀門外有紅菱池亦隸學宮

飲馬池在府城北五十里浮雲山南甘泉清冽相傳應智瑣義兵屯山下飲馬於此

劍池在府治後圃相傳仙人李八百淬劍于此中產白蓮宋黃庭堅賦製劍池之菡萏以為裳者是也又新昌縣北七十里亦有劍池傳是許旌陽磨劍所

星落池在新昌縣南三十里舊傳有星墜地成池雖旱不涸雖潦不盈

圳泉在府城南八十里南城村又府城西北馬鞍嶺有吳城瀑布泉



武泉在上高縣北十里泉深莫測溢為沼中多鱣鯉俗云不可食取食輒死上有晉皇甫武將軍廟故泉以武名

普潤泉在上高縣西十五里亦名貫珠泉其泉自石竇迸出莫窮其源循石厓為平池昔方廣十丈今止丈餘宋時有普潤院久廢

巖洞泉在上高縣南三十五里溉田甚廣抵新喻縣界

七星泉在新昌縣城內宋令劉明老鑿七井以應七星又縣西十里淨慧院內有五色泉

竹山泉在新昌縣西十五里柴源之竹山渦口氣充味厚絕無塵滓清晨汲飲可已腹痛

虎跑泉在新昌縣西黃檗寺方丈內舊傳有虎跑地出泉汲引不竭

丹井有五一在府治後圃仙人李八百煉丹之所一在府城東南四十里許旌陽煉丹之所一在城西十里晉丁義君女秀英煉丹之所一在城南七十里許可王三仙煉丹之所一在上高縣南二十五里許旌陽投丹之所  
狀元泉井即舊貢院井今在縣學戟門左井上有亭歐陽世善扁曰天一重清今廢

花塢井在府城北三十里明正德七年華林賊執通判姜榮妾竇氏至此投井死焉今作亭其上

白龍井在府城東十五里祥符觀昔有白龍出此故名

東陽井在新昌縣浴德池之左久塞

國朝康熙四年知縣黃運啓開濬

乳泉井在新昌縣西十里寶蓋寺之側其水瑩白如乳



袁州府

袁山在府城東北五里峰巒秀拔晉高士袁京隱居此山卒葬其側故名以袁名州義因山也大袁小袁兩山相對唐人詩袁山大小雙螺並秀水東西一帶橫

仰山在府城南八十里乃袁之鎮山也周迴數百里高聳萬仞可仰不可登因名絕頂有集雲峰入夏雲冒其嶺則雨立至冬微陰即停雪山下有唐鄭谷讀書處太平興國禪寺及二神廟小釋迦骨塔

湖岡山在府城南十五里晉鄧表故宅山頂有煉丹臺養丹池朝斗石

小仰山在府城南三十里晉鄧表修煉於此又號鄧表峰上有泉壇石臼藥竈又名水晶山宋州守蕭炳詩萬丈青山

插碧天真人煉藥石依然

蟠龍山在府城南四十里自麓至頂凡三十六曲有蟠龍寺唐末鎮南節度使鍾傳建四面壁立湍瀑飛瀉龍門關扼其前

石門山在府城南六十里石峭如壁中通小徑又南十里為木平山山有三峰宋州守王古禱雨有應遂名其中峰曰妙慶左曰瑞光右曰慈雲

震山在府城東十里下有巖幽深險僻唐彭雲隱釣於此寶應中徵召不就郡守嘉其行因名其鄉曰詔君鄉巖曰詔君釣臺唐盧肇有震山巖記又東十里為鵬山

坤長山在府城西南七里山自坤方來連亘甚遠故名書堂山在府城西南三十里唐盧肇讀書於此萬載縣西八



十里亦有書堂山晉習鑿齒避地處

石屋山在府城西北三十餘里洞深百餘丈有石柱石鐘石鼓之屬

老山在府城西南六十里崇高峻拔山巔飛瀑下注清瀝江北入秀江

寶山在府城北六十里世傳肅禪師過此山遇訟者勸之云欲出輪迴道先回自己心訟者以此言為寶故名

望鳳山在府城西北七十里中有一峰遠觀如鳳

喝斷山在府城北一百二十里與萬載萍鄉及湖廣瀏陽縣接境兩山峙若天門中通一徑為八省之咽喉

鈴岡山在分宜縣水南二里新澤水出于右長壽水出于左夾于山末故曰鈴山勢聳特登之可眺一邑上有仰山行

祠山腰有泉病者飲之輒愈山椒有問東亭明推官徐之孟創今傾圮

國朝守道施閏章重建撫松亭

仙臺山在分宜縣東南五里羣山環抱一峰高聳相傳昔有牧羊者登山遇兩仙對弈語曰子下界人也何為來此今名其村曰下界

鐘山在分宜縣東十里水南曰南鐘山水北曰北鐘山裴子野宋略云永嘉元年因洪水有大鐘從山下流出驗其銘乃秦時所造因名山有巨石臨江如峽故又名鐘山峽輿地紀勝云有漁人得一金鎖長數百尺又得一鐘如鐸狀舉之聲如霹靂山川震動漁者恐亦沉於水或曰此秦時驅山鐸也



昌山在分宜縣西二十里險嘗覆舟舊名傷山後改今名又名昌山峽顧野王輿地記云晉永嘉四年羅子魯於山峽堰為陂灌田四百頃

銀山有二一在分宜縣南二十里山巔多白石一在萬載縣西十五里山有巨石白如銀石間有洞可以避寇

清風山在分宜縣南三十里有寶慈觀西晉時黃仙姑嘗修煉於此有煉丹池又南二十里為白巖山有永清院

玉岡山在分宜縣西二十餘里卓立如削玉其下平夷幽曠又西為雪山鍾素山七峰之秀鎖昌山三折之灣古木繁陰冬有積雪又西為光子山以晉李琳得名又西為大梅山其山多梅成林

臺山在分宜縣北二十五里山頂平敞若臺

雞足山在分宜縣北八十里旌儒鄉山下勝因寺寺背有石孔日出鹽以足寺用後有利之者鑿而大之鹽遂止

徐仙山在萍鄉縣西三里世傳有徐姓者於此修真後仙去事詳夷堅志

筆架山在萍鄉縣南里許高聳秀拔與縣後山相對舊名迎鳳嶺以縣治勢如飛鳳而此山與之相迎也宋乾道中縣令趙公廩建堦其上高七丈許明嘉靖中知縣梁用達以孤峰獨聳增建其二於東三塔相連形如筆架嶺有四望亭仰山二聖壇遺址萬曆中知縣陸世勳重修

毛仙山在萍鄉縣東二十三里古有毛仙驛方輿記云昔有人過此山逢一人遍體生毛言辭異常後不復見朱子過此嘗問驛卒云狐魅所為遂題詩驛中



石姥山在萍鄉縣西五十里有石屹立如姥瞻望宋州守周  
兌詩頑然本是無情物應誤行人指望夫

南源山在萍鄉縣北五十里下有廣利禪院宋宣和中縣令  
鄭強建以息兵厲山南有泉四時不竭相近者為浴室山  
山下有浴池

九嶷山在萍鄉縣東七十里連帶九峰因名山側有仙鶴嶺  
若雙鶴飛舞狀

五金山在萍鄉縣西七十里五峰相連面皆向兌因名

楊岐山在萍鄉縣北七十里世傳楊朱泣岐之所傍有玉女  
殿內有九石房相映如屏風世傳仙真所居又有普通院  
及隋煬帝壇相近者為瑤金山唐勅封普濟大師道場也  
上有涿水洞靈丹井

楚山在萍鄉縣北九十里相傳楚昭王曾經此

武功山在萍鄉縣東一百二十里跨吉袁二府境舊志云紹  
興間洞寇猖獗趙辰統禁軍勦捕有功立柵山上因名據  
安福志山由陳武帝時更名素志疑失實

羅霄山與武功山相連下有石潭深不可測太平寰宇記云  
潭水傍出石乳又名石井歲旱禱之以大木長三四丈者  
投水中即雨水湧木出雨即止或曰昔有羅霄居此因名  
其下有羅霄洞據安福志盧蕭山本因瀘瀟二水得名素  
志別作羅霄或說乃譌傳也

龍山在萬載縣治後龍江經其下山勢崩旋為縣之鎮距治  
東南二百步有三石卓立潭中亦名筆架山縣南三百步  
有月臺山狀如滿月又縣東南二里許有白塔山



紫蓋山在萬載縣西北十五里山勢崇聳屹若車蓋舊名雲蓋山或云仙人謝仲初嘗遊此有紫雲上覆故名

五雷山在萬載縣北二十里五山相連與逍遙觀拱對遇早禱雨

湯周山在萬載縣西三十里相傳晉安帝時湯周二仙修道之所上有觀觀後有碁盤石試劍石

峰頂山在萬載縣西南三十里相傳為馬祖道一駐錫處舊有上中下三塔今惟中塔存焉有泉清冽歲旱應禱

金雞山在萬載縣北三十五里山童不毛有巨石在山下入夜現金雞故名

清泉山在萬載縣東北四十里絕頂有瀑布泉

謝山在萬載縣北七十里輿地廣記九域志皆以宋康樂公

謝靈運得名舊有靈應觀劉長者讀書堂今廢

九龍山在萬載縣西一百里其山有九嵯我秀麗常有雲覆之又西二十里為鐵山地界湖廣瀏陽縣舊產鐵

羊角峰在府城東十里雙聳如羊角一名雙箭峰

聳翠峰在府城西三十里峭壁孤峙唐盧肇有詩

甘竹峰在分宜縣西三十里

明山峰在萍鄉縣東北二十五里其峰特立可以四眺中有仁濟院

玉女峰在萍鄉縣東六十里亦名玉女墩輿地志云天將雨有五色雲氣湧出石間俗呼玉女披衣宋洪炎詩千年舊跡今蕪沒惟有長松挂蔦蘿

鷲鼻峰在萬載縣東五里地名東岐元虞集愛此山若蜀中



西江志 卷八  
三  
鷺鼻峰因名

神岡嶺在府治南八十步凡祀仰山皆由此故名又府城西四里有王坡嶺舊傳有王者葬此

銅釘嶺在府城西南五里相傳長沙溫氏墓宋初削平僭偽因鎔銅灌其頂於史無徵又西南十里為金鐘嶺

仙女嶺在府城西三十五里地名清瀝蓋宋成恭夏皇后父家也

嚴嶺在府城北五十里山勢峭拔自下而上有小徑十八折其頂名仰公山下有小溪溉田甚廣

澗富嶺在府城南六十里與安福縣接境宋嘉定四年嘗於此置寨以遏郴寇

大軍嶺在府城西北九十里山腰有泉名水漿湖相傳隋煬

帝時戰場

袁嶺在分宜縣西北十餘里其上峰如列戟舊傳東漢袁閔隱居其下

石分嶺在分宜縣南五十里抵安福界又南十里為仰嶺極高峻登之可遠瞰吉安城相傳唐時有尚雅祖師騎虎至此因建寺

多跡嶺在萍鄉縣南三十里山勢聳矗石形類多上有土濠相傳元季禦紅巾賊扼險于此

聖岡嶺在萍鄉縣東五十里衆山迤邐望之蒼翠晉甘卓築壘其上有聖岡廟建以祀卓又縣南馬跡嶺亦卓遺蹟

案山嶺在萍鄉縣北五十里左右兩山相峙中平如案因名有亭曰高寒為往來休息所



西江志 卷八 三  
鶴嶺即洪岡嶺在萬載縣西南二十里與仙遊巖相望

十八渡嶺在萬載縣北四十里舊路在嶺下循環一水往來  
凡十八渡後關路嶺上行者便之俗譌為十八洞

白水嶺在萬載縣西八十里高數十仞嶺下平坦居民衆多  
中有小溪水色白故名

黃皮嶺在萬載縣北八十里與謝山相對上有石屋相傳黃  
皮二仙修煉於此鄉人祀之

太陽嶺在萬載縣西一百里形勢陡峻周廣百里未旦日光  
先射傍晚不暝故名

萬勝岡在府城東五里楊吳時柴再用與米忠誠討劉景崇  
每出師岡下不戰一日列陣岡南大敗之見九國志

天子岡在府城西北五十里傍有駙馬塘

楊桐岡在萬載縣東北二里許其岡多產白楊桐樹縣西里  
許有赤硃岡產土硃其東建社稷壇

小南嶽在萍鄉縣西七十里山勢嶙峋上插雲表秋月登眺  
霞彩萬狀瀟湘廬阜悉在目中為縣境八景之一

化成巖在府城西北五里下瞰秀江舊名化成臺僧屋其上  
名開化院巖內有石佛唐李衛公德裕嘗讀書於此後祠  
之詳見古蹟

粟坑巖在府城西南七里深闊三十丈有小竇透明可步出  
巖頂

帝鐘巖在萍鄉縣北五十里高十丈深四丈中有倒石長三  
丈其形如鐘

翠巖在萬載縣城北百餘步石壁凌空面挹龍江巖下有穴



泉噴清冽

水晶巖在萬載縣西五十里巖中飛瀑瀉出如玉歲旱禱焉  
又縣西十里仙遊巖有石類鐘扣之清越又有石類道士  
狀俗稱仙人石

靈棲巖在萬載縣西九十里高數丈有崇勝寺巖下有泉自  
周公洞流來灌田數百畝相近又有龍成巖其地名梅陂  
山勢聳特中有石室宋元祐中有獵者逐獸至此後人往  
觀得一獸骨其頂穹然如角識者謂龍蛻骨也室中有石  
如列仙者數十下有石鐘扣之有聲有石硯巖溜注之墨  
橫硯上筆在硯傍皆石也有石人坐白沙傍如鬻鹽狀或  
埽之他日復積

玉谿洞在府城東半里許宋李觀夢符居之因自號玉谿叟

今塞府城東北五里有石窟洞石上有龍爪跡

青蓮洞在化成巖側小穴丈許虛明可愛舊扁曰雲谷

國朝康熙二年守道施閏章謂其狀如青蓮半開易以今名  
有石作蓮花半未開玲瓏幾曲盡莓苔之句

石乳洞在府城東三十里深一里許滴乳堅凝成觀音羅漢  
像人或遊宴其中殺核狼籍經宿如埽宋教授鄭王賓鐫  
石記其事太平寰宇記云宜春有石室山數石相連高十  
餘丈素壁如雪即此洞也

漠塘洞在府城北六十里初入闊可數丈有潭水流洞外繼  
入小洞漸遠一竇通明地名帶塘距漠塘已二十餘里鄉  
人嘗避寇於此

洪陽洞在分宜縣西十五里素嶺三峰之麓世傳葛洪及妻



陽所居洞口有巖巉屹如蓋由洞門入石室東向去地高數十丈初入一間曠爽可容百人由西竇而入始幽闇舊有人至七十二間聞昌山渡篙聲今遊者可至第十二間餘則隘不可行矣其中有白沙如鹽傍有鹽翁石傘石帆石鼓石田及仙佛諸像洞中有水春溢冬涸雲霞網緼一穴可通絕頂仰見天日俗呼天心又有石燕至春或能飛翔明邑人洪經奎有記

國朝康熙辛酉知縣蔡文鸞重刊洪陽洞圖有序

小洪洞在洪陽洞之頂門甚隘其中廣容千人有石倉石閣之類舊傳晉宋人有題名在深窈處無火不可入也

靈仙洞在分宜縣北三十里洞內去地三十丈景物不減洪陽但差小耳有丹爐闊二尺厚三寸許圓如月略玷缺傍

有一石磨與丹爐尺寸不差毫秒或以爲爐蓋也

桃源洞在分宜縣北一百三十里洞口空闊東北行半里許至一石室有石鐘石磬扣之有聲直北一室天窗虛明石級如田田傍生荔支有池泓澄石龍天矯其上距洞二里許爲風洞居山之陽不可入傍有泉流水潺湲清風生焉冬溫夏冷避暑者置盤餐於中食頃輒凍其上有亭

真如洞在萍鄉縣南三十里洞有石鐘石龜又有石如人形相近者爲裏大洞圓如覆鐘兩洞相接上洞有石名雪峰一石竅斜穿投以石良久乃抵湫流下洞口出山腹巨石如屏中有小谿兩洞可容千人宋建炎初避亂者多歸焉巨寇張成攻圍數日不克乃退又有下石陂洞在縣北四十里亦可避兵



竹山洞在萬載縣南二十里洞闊非丈尺計有水經其中爲  
學前江源前後兩門深五里許內虛敞有石田石屋一石  
高三丈類塑像遊者自後洞出前洞歲旱於焉禱雨

雲峰洞在萬載縣西九十里黃茅岡門闊丈餘中虛明循級  
而下則漸黑有石若鐘磬若仙佛不可枚舉澗內產魚及  
石燕里人禱雨者嘗窮其源辰而入出已日西

石穴在府城西北六十里燕州神廟穴內可行三十里見水  
繞竹叢莫知其源

牛欄峽在府城東二十里左有金雞山右有銀鉞山相對若  
欄素志云五臺三峽此其一也

盧石在府城東湖上相傳盧肇家石三峰九竅奇秀可愛宋  
州守祖無擇徙置湖上其詩云選置東湖最佳處四面澄

波映天碧倚空突兀無與鄰頓覺亭臺增氣色

響石在府城南三里獅子嶺北聲傳響答故名距府城南六  
十里有靈應石在仰山正祠內其形如靈龜之文

望夫石在分宜縣西十五里昌山峽水中地名望夫堰鈴岡  
志云唐會昌前有太守鄭公字望夫於昌山下百步餘修  
復舊堰引水自沙湖過李家村經縣治北合騎嶺水以灌  
田後人思其德以字名堰

鎖石在分宜縣南寶雲寺山傍有石壁立其紋橫起如扁鎖  
狀世傳石舊有竅有沈道人者結菴於此忽不見視石則  
竅已闔矣

金星石在萍鄉縣東五十里其石如室中有二星光采如金  
又縣東大安里有羅漢影石在白鷺坑宋元符間巨石中



裂其聲如雷一屹立一墜田間各有形如羅漢

巨囉石在萬載縣東一里荷花池東山巖側有石高數尺上有孔吹之若巨囉聲迴風入竅亦然縣北五里有獅子石狀類獅下有潭亦名獅子潭上鐫獅巖二大字傍刻大德二年春月書

謝仙石在萬載縣西四十里一名麻鞞石上有鞞跡

秀江在府城北門外源發羅霄山流經府城西十五里為稠江至府城北澄清深碧因名下經分宜縣治過新喻及臨江府流合章江

清瀝江在府城西南六十里源出老山山頂有瀑數派一派瀉山下為此江過鞏溪又過了山分二派一為官陂水一為古江又分二派一為司谿江一為新江會為麟橋江入

於秀江麟橋江今在府西六里司谿江一名沙陂江古江舊傍山流今湮為田

嚴塘江在分宜縣東南三十里發源檀溪及李家礮出水口會新喻江

峴江在分宜縣南五十里出自雙源裏源會於雷同嶺下入章谿至石巖下為峴江築陂灌田數千畝

赤江在分宜縣北文標鄉源出珠塘之泉下流三十里由江斜出昌山峽而合秀江

楊江在分宜縣西北四十里順流會秀江水

新江在萍鄉縣東三十里唐咸通中刺史顏遐福奏開以通湖南纜鑿十餘里而輟今俗稱其地為新江相傳開江時誤殺白龜功遂不就



西江志 卷八  
龍江在萬載縣北五里源出縣西一百二十里金鐘湖下流入瑞州府境

錦江在萬載縣北三十里源出謝山邑人敖玉谿建橋

東湖在府城東三十步宋至和二年州守祖無擇於湖上建亭榭為觴詠之所淳熙間張杓知州事兄棫過此書扁後廢為圓菴嘉定間州守滕強恕濬湖修築今廢又城西十里石湖

落星湖在分宜縣西五里廣五十餘畝其深莫測傍有龍祠歲旱應禱世傳唐耕者向氏母居此一夕見巨星流於屋遂成湖縣北二里有石岡湖廣六十丈灌田數百畝金鐘湖在萬載縣西一百二十五里水分二派一東流至官莊過竹渡入龍江一流入湖廣瀏陽界

九曲水在府城南五里縈流凡三十里出赤橋入秀江

仰山水在府城南六十里源發仰山東流出浦村入秀江

夢水在府城東八十里太平寰宇記云昔鍾儀於此村欲立縣夜乞夢果符所祝名曰思縣因以名水

介谿水在分宜縣北十五里發源界塘渟洄清澈中有巨石平坦可坐其水冬夏不竭溉田千餘畝東南流十餘里至耽江會秀江水

竹橋水在分宜縣東北二十里自臺山發源至聖陂普光橋出小江口

汭江水在分宜縣南五十里源二左自仰嶺右自黃真人臺下旋繞至大清里泉江山下二水相夾出安福同橋廬陵板陂至吉水同江聚入贛江



萍川水在萍鄉縣南三十餘步源發楊岐山東流轉西四十里到縣又九十里入湖廣醴陵縣界出淶口過潭州入洞庭湖宋蔣之奇詩倒流楊岐水即此

泉江水在萍鄉縣東二十里江心有泉湧出故名水中生絲花菜可食

羅霄水在萍鄉縣東南四十五里源出羅霄洞下分兩派東流者合縣東蘆谿水至宜春西流者出本縣境合湘東江入醴陵縣界

康樂水在萬載縣東北三十里太平寰宇記云謝康樂嘗遊此因名源出謝山東流至丘江合龍江出上高

野瀦河水在萬載縣西三十里源出金鐘湖北流過魚鱗灘會竹渡水合龍河奔騰峻急舟行甚險里人立水府祠以

### 鎮之

劍池水在萬載縣西一百里池廣丈餘別有曾家源水經過於池合流下井田同靈棲巖水出沙江入金鐘湖舊傳許旌陽捕蛟洪州時蛟潛逃池中旌陽捕斬之因名

石洞水在萬載縣西南二十里源出竹山洞北流過楊河山合白沙水下南浦橋至縣學前過雙虹橋而入龍江

避賢溪在府城南三十里仰山正祠前自仰山徙廟于此見宋張商英碑記

鸞溪在府城西北六十里下流入秀江俗傳吳綵鸞與文簫游此

塢溪在萬載縣治東源出鸞鼻峰西流會學前江

雷潭在府城東北五里秀水至此成潭舊傳龍潛於內上有



峭壁石罅龍鱗印苔成痕潭邊有釣魚臺竹木陰翳

石牛潭在府城西五十里江流中有石牛又西二十里爲飛劍潭相傳唐有王將軍者坐石上墜劍入潭今石上劍痕猶存

獺逕潭在府城南仰山之上泓渟澄深神龍所宅仰山又有雪谷潭水極冷雖盛夏不可濯

黃土潭在分宜縣西南二里昌山峽水下流匯而成潭其側有西關洲又縣南三里有楊柳潭縣東鐘山峽有轉鐘潭世傳黃巢黨以鐘烹牛其鐘靈轉入水

韓澣潭在萍鄉縣北十里深可二丈傍有韓將軍廟縣北七里有敷潭盤旋若渦有龍居之傍建惠澤龍王廟

簫仙潭在萍鄉縣西八十里匯五溪之水岸有巨石世傳簫

史休息於此縣東百二十里有青龍潭旱禱輒應

龍潭在萬載縣東北龍江中相傳有穴與獅子巖通舊有龍江亭今廢

鍋泉潭在萬載縣西南九十里有三巨石枕江澣石中有泉天將雨雲氣自中起如炊煙俗名石鍋

盧洲在府城東演武場後以盧肇得名今縣學乃肇故居此洲向多喬木爲居民所據蹟漸湮明萬曆六年知府鄭惇典清復之仍種樹其上萬曆末年知府黃鳴喬建高閣以祀肇督學黃汝亨扁曰文標

沙米洲在分宜縣治東鐘山峽中春夏湍急白沙擁起兩岸如米邑人以占豐歉若南岸饒則南岸豐北岸亦然

金鰲洲在萍鄉縣西萍實橋下其長百餘步狀如沂水魚楊



岐之水至此匯為潭流入萍川此洲為中流砥柱舊名金魚以其形長而大改名金鰲又在儒學禹門之西明知縣陸世勣因建占鰲閣其上

龍洲在萬載縣東北二里許即龍河渡約廣數百畝石洞金鐘湖二水西來環抱合流而東注

鳴玉池在府治西隅唐刺史張某勑今改為疏泉以疏西陂水至此也府治內有澄源池宋乾德二年州守呂延貞鑿取為政當澄其源意府治西北有防虞池因防火而名元季填塞今作軍營府治東南有礮沙池池內有石如礮

西池在府城西唐乾元中刺史鄭審所開池上有故城潭木瓜島薔薇洲楊柳堤青田壇石橋灣釣磯今廢

洗硯池在宜春縣學內相傳池中產綠毛龜

鳳凰池在萍鄉縣治南百餘步宋宣和間知縣鄭強因民多瞽乃相縣後地形如飛鳳展翼因鑿二池以象二目而民遂無盲疾元至大二年有瑞蓮生池中夏鎮撰記年久淤塞地為居民所侵明萬曆初強裔孫鄭惇典知府事清復之立鳳凰池碑七年知縣常自新令民種蓮於池清翠交映四周架以木欄

國朝順治間知縣刁之裔余士聰相繼疏濬  
梳洗池在萍鄉縣東蘆溪鎮南玉女臺右

綠陰池在萬載縣南百步池廣四畝樹木陰翳

宜春泉在府城西四里唐地志云宜春泉醞酒入貢蓋指此一名靈泉舊傳泉日兩涌與海潮通後人滌漑其中遂止有比目魚今不常見



西江志 卷八  
珠泉舊名湧坑泉在府城南門外方廣丈餘平地湧出溉田甚廣明萬曆丙申推官徐之孟築臺其下建樓東西連簷接棟與宜春臺相望萬曆己未知府黃鳴喬重修後燬國朝順治庚子知府胡希聖重建視昔加美

孚惠聖泉在宜春臺仰山行祠下冬夏不竭病者飲之良愈宋政和間張沈為銘今填塞

溫泉在府城西南三十里修仁鄉定光院前氣溫如湯冬可浴以雞卵投之即熟水中有魚泉凡三出一在東岸上僧人甃為池一湧出江心巨石中石類釜上寬五六尺許平坦可坐遊者多於此宴飲一在西岸下宋黃叔萬詩離火自天爍溫泉由此生

甘泉在府城北十五里山竇中流出味甚甘冽唐咸通二年僧道光築室為甘泉院宋嘉祐中州人李觀因僧智汪建二堂為之記又北十五里有濇泉灌田萬餘畝

卓篙泉在分宜縣鈴岡相傳仰山二神維舟卓篙於半峰遂有泉涌出舊建亭明萬曆六年知府鄭惇典重修

源澗泉在分宜縣大清里溉田百餘畝

聰明泉在萍鄉縣西一百步其泉甘香宋葉景武讀書於此後登第故名縣西門外三里許有橫龍泉其泉出地中透佛座前至堦下清冽可愛金魚游泳人多題句

暖泉在萍鄉縣蘇家村冬溫如湯又有冷泉在宣教里夏冷如冰飲之能已熱疾又清江里有寒泉盛夏極清冷

楓泉在萍鄉縣東二里許夏不涸冬不凝昔嘗汲注銅壺以定更漏傍有楓樹故名



雨湧泉在萍鄉縣北楊岐山相傳通海天欲雨水先湧  
溥泉在萬載縣東一百五十步儒學前其泉臨江味極甘美  
縣西二百五十步有卓劍泉在廣報觀右世傳謝仙以劍  
刺地泉湧出舊有亭今廢  
涂泉在萬載縣東十里名泉陂約廣十畝澄澈泓渟有龍居  
之每旱官民禱焉

義井在府治東集慶坊唐刺史李將順開鑿後湮塞宋淳熙  
間州守張杓修復之明弘治庚申知府朱華加濬

雙清井舊為龜鼻井闊丈餘內有兩小石孔在府治東北廿  
棠坊府儒學之左揚清井舊為左龜眉井橫二尺長六尺  
在府治北達里坊澄清井舊為右龜眉井橫直同在縣治  
前文會坊東明井舊為左龜目井闊丈餘在府治東北隅

達里坊西明井舊為右龜目井在古開元寺浴院後今縣  
治前文會坊之西以上五井舊志云府地形如龜唐袁天  
罡於城內鑿龜鼻眉目井以全龜象不專為民汲亦取克  
制回祿之意歲久淤塞

國朝康熙戊申知府李芳春查覈原井挑濬今俱疏通如舊  
闔城便之

秋家巷井在府治北百餘步清水池西委巷中井水特重漏  
壺用之又司理院井其水亦重

羅霄井在萍鄉縣羅霄山下即葛仙浴丹池也

聖井在萬載縣東北安仁坊世傳宋乾道間普菴禪師嘗游  
息於此時值多疫師取井水飲之疫遂痊

真君井在萬載縣西廂外二百步世傳謝仙曾經此就嫗求



西江志卷第八  
水嫗辭水遠難致謝指其地曰鑿此可得水後果驗

西江志卷第八



卷之二